

Le Saltà



PLATA D'ENFORMAZIUN DAL **COMUN DE MAREO** - Nr. 37 - ediziun de agost 2022

Comun de Mareo, strada Catarina Lanz 48, **39030 Mareo**, telefonn 0474/501023, fax 0474/501644

En tesur da descori



Trec á daidé

Ince eniann á le Comitè Comunal dla Jonëza organisé le dé dal ambion. A Al Plan, La Pli y Rina é pici y gragn gnüs a daidé romené sö i paisc. Dèr bel iolan.



Encunté la jont

L'Aministrasiun á tigní les encuntades con la popolaziun: al é gnü enformé sön le laür fat te còsta legislatöra, la situaziun atuala y val' proiec por le dagní.



Regoles nees

Le Consèi de Comune á aproé müdaziuns emportantes al regolamont por les gradatöres dal frabiché alesiré. Y ince por la cortina d'Al Plan é l val' novitès.

Na sbürla por La Pli

Mareo s'á assügheré en bel contribut de 1,6 miliuns de euro dal PNRR, le plann nazional de ripreja y resiliënza. Ai jará a bën dal païsc d'La Pli.

De dezëmber dal 2021 á le Ministêr dla Cultura talian scrit fora na bandida por i comuni, co á la poscibilitê da prejenté proiec de revalutaziun culturala, soziała y ince economica dai zëntri storics, o dai "borghetti storici" desché al é scrit. Te cösc plann á ince le Comune de Mareo odü fora en gran potenzial y s'á enschiö defata motü al laür por arjigné jö le proiet, messân pö belo dé jö la domanda amez merz. Tla Talia él gnü prejenté endöt 1.791 proiec y danter chisc n'él ince 45 de Südtirol. Dui comuni de nosta provinzia á la poscibilitê da gní pro; al é sté na gran ligrêza ai 23 de jügn, canche an é gnüs lassora che dlungia en proiet da Schnals, gnêl ince finazié le proiet dal Comune de Mareo. Entrami ciafará en bel contribut de 1,6 miliuns de euro.

Nosc Comune á prejenté le proiet **"La Pli - en tesur da descori"**, co é gnü laoré fora te püces edemes dal Ombolt Felix Ploner deboriada con l'assessur Ludwig Rindler, le journalist Iaco Rigo y l'injenier Andreas Terrabona. Döt cant con le sostên dla firma Forteam da Balsan, co á motü a desposiziun so förtl dandadöt con propostes y por arjigné jö döta la documentaziun co jea debojügn. De chëra n'orêl ester bel assá, sce an ponsa che ala fin él gnü fora en bel poch con 208 plates. Atló ves cuntunse en cört ci che al dess garaté tres cösc proiet y cares co é les intenziuns dal Comune.

Damperfora él da dí che La Pli á dötes les condiziuns y le carater da "borghetto storico", sc'i ponsun dandadöt al zënter con la calogna, la dljia, la cortina, la Gran Ciasa y dessot ince la Ciasa Somür. Le proiet prejenté da nosc Comune é pié ia en particular dla orenté da ressané la calogna, olache al é lëite önn dai archifs plü emportanc de nosta diozeja. An á porchêl tut sô contat con la Ploania y slüt jö na convenziun empara co definêsc plü avisa co che ara gnará adorada. Damperfora él da dí che döta la



Frabiches storiches a La Pli: calogna y Gran Ciasa. (Foto: Iaco Rigo)

frabica gnará ressanada y che al romagnará sambën la lerch co vá debojügn por le ploan y la Ploania.

Tal proiet PNRR él preodü da revaluté döt l'archif, co dess ince gní daorí al publich. Cösc ô dí che les portes dal archif dess ester davertes ala jont y dandadöt ince a stüdiês co ô enrêscce plü a funz i documonc. En fin plü ampl é chël da podêi avêi en bel dé a La Pli düc i documonc

dles ploanies dla Val Badia. Dlungia l'archif él preodü da arjigné ete na picia biblioteca con publicaziuns sôn la storia y l'ert dai ladins y lapró dessel ince garaté dui de pici cuatiers por porsones co sojornêia plü dio a La Pli por fá enroschiüdes co á da fá con le païsc o nosc comune.

COOPERATIVA DE COMUNITÉ

La calogna d'La Pli sará spo ince



Cater retrac dla calogna d'La Pli daete: na belijia y en patrimoine. Na gran pert dal contribut vá por le ressanamont y por daorí l'archif al publich.

la sonta de na cooperativa che an ô mèter sò por le proiet. Ara se trata de na Cooperativa de Comunità, na forma nea de cooperativa co é conzedüda te Südtirol empormó da eniann de jená encá. Pla cooperativa pó sté ete tambèn porsones privates, co ince uniuns y istituziuns desco p.ej. Comune, Ploania, etc. Al dess ester na cooperativa dla jont, ára pò por le proiet y por le païsc na funziun dèr emportanta. La cooperativa de comunità manajará l'archif y la biblioteca, mo ará ince le compit da mèter sò en zènter de enrescida, documentaziun y formaziun. Còsc zènter prevèiga da organisé cursc y workshops co á da fá con la identité, cultura y lingaz ladins, al dess mèter en pé manifestaziuns desco mostres, conzerc, teatri y d'ater – dõt sambèn en colaboraziun con les uniuns y la jont dal post. Desco evont particular encèr la cultura prevèiga le proiet da porté sòn paladina na opereta ladina nea, sot al patrozone dla uniun EPL – Ert por i Ladins. Por en bun funzionamont dla cooperativa él preodü da tó sò personal.

NA PLAZA CO ENVIËIA DA STÉ

Tre les initiatives y proiec che le zènter organisèia gnará aledé sòn plaza. Ensciö rounse a na secunda pert emportanta dal proiet – le ressanamont y adatomont dla plaza. La Pli é önn dai püc païsc olache la jont s'archita ciamó dô mëssa sòn plaza a s'la cunté. Tres le proiet él preodü da arjunje còsc travert: arjigné la plaza desco post



La Ciasa Somür: con le contribut vègnel finanzié en plann de finanziaimont por valüté la poscibilité da arjigné lèite na botèga con bar. (Foto: Iaco Rigo)

d'encuntada, spersa co miorèia l'azes ales frabiches storiches, mo ince desco post de liam danter les generaziuns, post de comunicaziun sozuala, d'esposiziun, d'organisaziun dles ativitès culturales, mostres y conzerc, por tigní les festes religioses. Ara dess ester le post olache an pèia ia por fá la roda dles viles, la roda dles saüs... en post da sté a palsé y ciagé ispiraziun. Dit en còrt: en post co envièia la jont da gní pormez y da sté.

BOTÈGA POR LA JONT Y I PAURS

Te còsc proiet án ince slüt jò na convenziun con le patrun dla Ciasa Somür Willeit Walter, deache danter i fins fossel ince chël da ti dé zoruch al païsc na botèga con bar pormez.

Te còsta botèga dess la jont sambèn ciagé i bojügn primars, mo al é preodü che an ciagi da cumpré ince souvenirs sòn le païsc, sòes carateristiches, le santuar de Santa Maria dal Bun Consèi. Nia enultima òn ti dé la poscibilité ai paur dal post da vène enlò sù produc. Porchël ince en impuls economich de còsc vers. Tres le proiet él preodü da finanzié en "business plan", co dess definí ci co se lascia efetivamont fá. Al sará spo sambèn le privat co ará da fistidié por l'adatomont dai locai.

LES 14 AZIUNS

Còstes é mà les perts plü emportantes dal proiet. Dõt adòm él preodü da porté ennant 14 aziuns plü monüdes, ch'i cumpedun sò atló en còrt: 1) Restruturaziun dla calogna y daorí l'archif y na biblioteca; 2) Sistemé la plaza; 3) Daorí tla Ciasa Somür na botèga con picio bar (finanzié le business plan); 4) Istituziun de na cooperativa de comunità co ativèia le zènter cultural y de formaziun; 5) Manifestaziuns y festival da d'isté sòn plaza; 6) Encuntades, cursc y workshops por na imersciun te lingaz y cultura ladina por pici y gragn; 7) Mobilité: coordiné i flusc de jont, mioré le coliamont con le Mareo Bus, laoré fora en tru da jí a pé danter Al Plan y La Pli; 8) Revitalisé y renové les vedles sèmenes y trus danter les viles; 9) Mioré le tru dla roda danter Sares - La Pli - Longega; 10) Promozion dla diversificaziun dles azièndes da paur; 11) Ativé orar d'ambulatory; 12) Realisé en percurs storich-cultural; 13) Mapa grafica dla contrada, Roda dles Viles; 14) Reconèsce l'archif de calogna desco patrimoine cultural UNESCO.

PROIET DLA JONT, POR LA JONT

Dõt adòm ascogn còsc proiet en gran potenzial por le païsc d'La Pli. Còsc se lasciará endere mà descorí sce la jont dèida y fej empara. Al é en proiet por la jont y dess porchël ince gní realizé deboriada con la jont, por che la comunità le sonti ala fin ince so. Al ti dá al païsc d'La Pli na poscibilité emplü da gní revalüté dal punt d'odüda storich, cultural, sozial y ince economich. Al gnará tosc fat na encuntada publica olache al gnará splighé dõt plü avisa. La data gnará comunicada adèrtora.



Lerch por la cultura. Na cooperativa dess manajé ince l'organisaziun de evonc culturali, musicali, artistich... deboriada con uniuns y istituziuns.

Asfalc nös, fira y proiec dês ia

Deliberes dla Junta de Comune dai 7 de merz ai 13 de messé 2022

LAÛRS

SALF DLA MUSIGA - LA PLI:

Tla sontada dai 14 de merz él gnü **aproé en proiet de varianta**, por na soma de 124.573,90€ plü IVA. La Junta á aproé la pröma pert dai laûrs da för fac dla **firma Isifer Srl da San Martin de Tor** y á aproé da ti paié fora le zertificat de paiamont nr. 1 co munta sö a 19.360,56€; al é gnü aproé la 4. pert dai laûrs da moradú, fac dla **firma Steiner Bau Srl da Valdaora** y al é gnü aproé da ti paié fora endöt 68.812,44€; al é gnü aproé la pert finala dai laûrs termosanitaris fac dla **firma Termo Palfrader Sas d'La Pli** y da ti paié fora 8.701,78€ plü IVA.

Por i laûrs dai func frëic, co ti é gnüs sorandês ala **firma Obojes Oswald**, él gnü aproé en verbal dai prisc nös co comporta na spëisa emplü de 46,08€ plü IVA. La **firma Nagà d'La Val**, co á cialé l'enciaria da fá i laûrs da tiser, é ciamó gnüda enciariada da arjigné y mëter sö na porta por le lift y na cornisc por l'entrada dal

lift. La soma é de 3.996,23€ plü IVA. Tla sontada dai 30 de má él gnü enciarié l'**arch. Walter Brida da Porsenú** da laoré fora en proiet de varianta urbanistica, por en onorar de 26.408,79€ (contr. y IVA lapró). Emplü él gnü aproé **cosc emplü** de 39.185,05€ (contr. y IVA lapró) por la direziun dai laûrs, co é tles mans dal **stüde hbpm Ingenieure da Porsenú**. Por fá i laûrs deforaia él gnü enciarié la **firma Betonform Srl da Gais** y la **firma Bauexpert Spa da Bornech** da condü le material aladô, respetivamenter por les somes de 558,68€ y 192,10€ (prisc con IVA lapró).

Tla sontada dai 21 de jügn él gnü aproé la pert finala dai laûrs da eletricher fac dla **firma Electro Ploner d'La Pli**, y da ti paié fora 25.055,81€ (IVA lapró). Al **p.i. Jan Palfrader d'Al Plan** él gnü aproé da ti paié fora la soma de 2.005,68€ (contr. y IVA lapró). Al é gnü aproé la pert finala dai laûrs pai func cialc fac dla **firma Erlacher David Srl da Antermëia** y da ti paié fora 6.357,51€

plü IVA; la pert finala dai laûrs da moler fac dla **firma Malbo Snc d'La Val** y da ti paié fora 9.244,66€ plü IVA; la pert finala dai laûrs da tiser fac dla **firma Nagà Srl d'La Val**; la pert finala dai laûrs da för fac dla **firma Isifer Srl da San Martin** y da ti paié fora 611,66€ plü IVA; la pert finala dai laûrs da moradú fac dla **firma Steiner Bau Srl da Valdaora** y da ti paié fora 7.953,25€ plü IVA; la pert finala dai laûrs pai func frëic fac dla **firma Obojes Oswald de Mareo** y da ti paié 1.983,37€ plü IVA; la pert finala dai laûrs ples stotôres de lën fac dla **firma Unionbau Spa da Türesc** y da ti paié 30.297,92€ plü IVA.

Tla sontada dai 13 de messé él gnü enciarié le **geom. Helmuth Palfrader** por fistidié da porté la stotôra a cataster. L'onorar é de 3.108,56€ (contr. y IVA lapró).

CIAMP DAL SPORT - AL PLAN:

Belo dal 2018 y 2019 él gnü fat les deliberes con les enciaries por le ressanamont dal ciamp dal sport



Ensciö ciara fora daete le salf nò dla Musiga d'La Pli - situaziun amez messé.



Al vèn laoré por la fira otica a Rina.

d'Al Plan. I laûrs é ince belo gnüs fac. La Junta á ciamó mossü aproé na picia varianta pal proiet, co ne comporta degünes spëises emplü. Tla sontada dai 13 de jügn é el ensciö ince gnü aproé la pert finala dai laûrs fac dla **firma Sportbau Srl** y al é gnü aproé da ti paié fora ala dita la soma finala de 101.795,17€ plü IVA.

FIRA OTICA AL PLAN: La firma **Erlacher Markus d'Al Plan** é gnüda enciariada da fá i laûrs por la fira otica tal toch danter Ciasa de Comune y Ciasa dal Parch Natural, por la soma de 46.345,78€ plü cosc dla sügherté de 1.353,47€ y plü IVA - endöt 57.895,02€.

FIRA OTICA RINA Y LA PLI: Tla sontada dai 11 d'aorí á la Junta fat fora da ti paié ala **firma Alpenbau da Terenten** la soma de 142.908,74€ plü IVA (cosc dla sügherté lapró) desco antizipaziun por i laûrs. Tla sontada dai 9 de má á la Junta aproé en test de garanzia por podëi damané dô enstëssa che al **ti vëgni paié fora al Comune na antizipaziun** sön le contribut europeich conzedü por le proiet dla fira otica (apresciapüch 1 milion de euro endöt). La Junta ti á sorandé al **dr. inj. Maurizio Kastlunger** con stüde a Bornech la enciaria de direziun dai laûrs, por en onorar de 53.845,11€ (contr. y IVA lapró). Tla sontada dai 21 de jügn é gnü aproé la pröma pert dai laûrs fac



Ince tal païsc d'Al Plan, sö por Al Plan Dessora, é gnü ciaé cotan por mëter jö l'infraströtöra por la fira otica.

dla **firma Alpenbau** y da ti paié fora 184.688,68€ plü IVA.

EGA DA BÈRE D'AL PLAN: Desche i án belo scrit, án t'Al Plan ciarestia d'ega da bère. Cösc sozeda d'invern, canche al plö püch y le païsc é plèn de jont, tan co soradöt tal tomp da Nadé y da Carlascé. Le Comune con le Consorzi dal'Ega da Bère ô pié sö ega ples fontanes da Lé dla Crëda. Por arjigné le **proiet co sorviarä da damané dô la conzesciun**, á la Junta enciarié ai 11 d'aorí le **dr. inj. Walter Ferdigg con stüde a Bornech**, por en onorar de 27.755,00€ (contr. y IVA lapró).

SONTA NEA CRUSC BLANCIA: L'injenier **Hartmann Campidell con stüde a Bornech** á ciafé l'enciaria dla colaudaziun statica dla sonta nea, por en onorar de 1.141,92€ (contr. y IVA lapró). Le stüde **Baukanzlei Sulzenbacher & Partner da Bornech** é gnü enciarié con la coordinaziun dla sügherté tla fasa de proietaziun y esecuziun, por en onorar de 29.600,82€ (contr. y IVA lapró).

ILUMINAZIUN PUBLICA: L'Aministraziun de Comune laora ennant por renové l'iluminaziun publica sön döt le teritore comunal. La Junta á enciarié le **p.i. Georg Mutschlechner d'Al Plan** da arjigné le proiet de mascima, le proiet esecutif y la documentaziun da scrí

fora i laûrs, desco ince da sorantó la direziun dai laûrs y la contabilité. L'onorar é de 8.922,81€ (contr. y IVA lapró).

RESSANAMONTYAMPLIAMONT DLA SCOLINA D'AL PLAN: Al é gnü aproé la pert finala dai laûrs fac dla **firma Termotecnica Kastlunger d'Al Plan**.

CONDÜTA PRINZIPALA "RUNCAC": Tla sontada dai 13 de jügn é gnü enciarié por la soma de 5.600,00€ la **firma Pronorm Consulting Srl da Balsan** da laoré fora la documentaziun co vá debojügn por scrí fora i laûrs. La **firma Verginer Bau Srl & C. da San Martin** á ciafé da fá i laûrs por 241.980,49€ al neto dal arbas de lizita dal 15,15%. Pla soma é da cumpedé lapró 10.178,87€ de cosc por la sügherté, y la firma mëss mëter na garanzia bancara dal 2%, tan co 5.043,19€.

INFRASTRÖTÖRES PRIMARES RAIUN D'ESPANSIUN "C5 - RUNCAC" Y RAIUNS TURISTICS "RUNCAC" Y "RUNCAC I": La **firma Termotecnica Kastlunger d'Al Plan** á ciafé da fá laûrs por la soma de 75.046,21€, al neto dal arbas de lizita dal 0,5%. Pla soma mëssel gní cumpedé lapró 1.847,05€ de cosc por la sügherté, y la firma mëss mëter na garanzia bancara dal 2%, tan co 1.537,87€. La **firma**

Erlacher Herbert & R. Srl d'Al Plan á cíafe da fá laùrs por 37.338,13€ al neto dal arbas de lizita dal 0,01%. Pla soma éi da cumpedé lapró i cosc dla sügherté de 1.152,95€ y la firma mëss mëter na garanzia bancara dal 2%, tan co 769,82€. **La firma Klapfer Bau GmbH con sonta a Terenten** á cíafe da fá i laùrs por l'urbanisaziun dai raiuns turistics, por la soma de 170.970,73€, al neto dal arbas de lizita dal 4,65%. Pla soma éi da cumpedé lapró i cosc dla sügherté de 6.864,08€ y la firma mëss mëter na garanzia bancara dal 2%, tan co 3.556,70€.

RESSANAMONT STRADA BRACH - BIËI DEFORA: Tla

sontada dai 13 de jügn éi gnü aproé le verbal de gara y i laùrs ti é gnüs sorandês definitivamenter **ala firma Niederwieser Bau Srl da Sand ta Türesc**, por la soma de 374.100,25€ plü IVA, al neto dal arbas de lizita dal 6,60%. Lapró mëssel gní cumpedé i cosc dla sügherté de 8.400,00€. La firma mëss emplü mëter na garanzia bancara dal 2%, tan co 7.650,01€

RESSANAMONT STRADA RARA: Tla sontada dai 13 de jügn éi gnü aproé le verbal de gara y i laùrs ti é gnüs sorandês definitivamenter **ala firma Nordbau Peskoller Srl da Kiens**, por la soma de 513.814,17€, al neto dal arbas de lizita dal 13,19%. Lapró mëssel gní cumpedé i cosc

dla sügherté de 17.000,00€. La firma mëss emplü mëter na garanzia bancara dal 2%, tan co 10.616,28€.

CIASA DAL SPORT AL PLAN: **Le stüde hbpm Ingenieure Srl da Porsenú** é gnü enciarié da atualisé le proiet esecutif, por en onorar de 6.280,56€ (contr. y IVA lapró).

PLAZA DLA SCORA AL PLAN: **La firma Martinelli & Benoni Srl da Tront** á cíafe na enciaria emplü por la sistemaziun dla plaza, por la soma de 31.236,84€ plü IVA. Lapró éi gnü aproé la pert finala dai laùrs fac dla medema firma, y da ti paié fora la soma de 6.254,63€ plü IVA.

ENCIARIES

Firma Erlacher Markus - Al Plan: 5.292,90€ plü IVA de cosc emplü por i laùrs de sügherté sön la strada de "Plan dal'Ega".

Kufgem Srl - Kufstein (A): La Junta á trat zoruch söa delibera nr. 06/2021, con chëra che la firma á cíafe l'enciaria da fá le design nò por la plata internet dal Comune, por la soma de 4.446,90€ (IVA lapró). Al é gnü fat na delibera nea con la soma de 4.471,30€.

Tezzele by Esperia Srl: 3.391,50€ plü IVA al 4% por la stampa dla plata d'enformaziun dal Comune "Le Saltà", ediziuns dal 2022.

Stadtwerke da Bornech: 305,00€ plü IVA y 147,50€ plü IVA por taché ete ala fira otica la scolina da Rina.

Kofler & Rech Spa - Valdaora: 10.000,00€ (IVA lapró) por condü asfalt con chël che i laoranti de Comune cuncia fora strades.

Kofler & Rech Spa - Valdaora: 115.225,20€ plü IVA por fá asfalt sön la strada Catarina Lanz d'Al Plan (Comune - Ciasa dal Parch); 7.660,00€ plü IVA por asfalté tla burcia al'entrada d'Al Plan; 23.432,00€ plü IVA por fá asfalt sön la strada Al Plan Dessora; 27.386,50€ plü IVA por asfalté sön la strada Ciasé a Al Plan; 28.662,00 plü IVA por fá asfalt ete por la Val de Mareo; 61.225,00€ plü IVA por fá asfalt sön la strada por Ciaseles.



L'Aministraziun á fistidié da lascé fá trec asfalt. Dessora: an s'arjigna da asfalté da Comune sö; dessot: la bela strada asfaltada, cunciada, roadá.



Le Comune en colaboraziun con la Cooperativa Turistica fistidiëia ince da tigni bun les plazes dai jüc. A Al Plan él garaté cotan de blèites nees.

Eltronix - San Laronz: 1.726,30€ (IVA lapró) por cuncé les sirenes d'alarm tla Scora de Musiga.

Eltronix - San Laronz: 1.122,40€ (IVA lapró) por le laür da baraté gestur dal telefonn.

Euroform K. Winkler Srl: 17.958,00€ plü IVA por condü y mëter sò jüc por les plazes dai jüc dal comune de Mareo.

Archplay Srl - Algund: 1.405,80€ plü IVA por condü y mëter sò jüc por les plazes dai jüc dal comune de Mareo.

Artejanat de Moling Oskar & Co. Sas - La Val: 5.760,00€ plü IVA por laürs da mioré l'acustica te scolina d'La Pli.

Verginer Bau Srl & C. Sas - San Martin de Tor: 11.763,20€ plü IVA por laürs de drenaja sön la strada tla localité "La Costa" a La Pli.

Niederbacher Prostahl Srl - Kaltern: 713,25€ plü IVA por condü trèi gratuns por la scolina d'La Pli.

Myo Srl - Ravenna: 1.300,30€ plü IVA por material desvalí por i ofizi de Comune.

Cubus Srl - Balsan: 3.369,00€ plü IVA por cuncé injins da ginastica tles palestres da Rina y Al Plan.

Termotecnica Kastlunger - Al Plan: 5.580,00€ plü IVA por en sistem de ariaziun controlada tla scora mesana d'Al Plan.

Elektro Service Eros de Lo Re Eros - San Martin de Tor: 2.877,28€ (IVA lapró) por laürs eletrics te scora elementara d'La Pli.

Firma Erlacher Markus - Al Plan: 5.500,00€ plü IVA por laürs de prescia pla condüta dal'ega dla plöia sön la strada Catarina Lanz (raiun Pech Martin).

Firma Obojes Markus - Valdaora: 1.427,40€ (IVA lapró) por condü scorzes da mëter jö tles plazes dai jüc dal comune de Mareo.

Stüde p.i. Georg Mutschlechner - Al Plan: 6.148,80€ (contr. y IVA lapró) por arjigné le Plann dla löm (Lichtplan - Piano luce). Ara se trata d'en plann co analisëia la situaziun atuala dla iluminaziun publica y privata alaleria, con provedimonc de adatomont, aladô dai critërs belo definis dala Junta Provinziala con delibera nr. 2057 dai 30.12.2011.

Rauch Garden & Home Srl: 347,48€ plü IVA por en omerel dal sorëdl por la scolina da Rina.

Archimedes Snc - Mühlbach: 463,60€ (IVA lapró) por cumpré materiai por la scolina d'La Pli.

AZIUNS LIZITADES

I Comuni é confrontës con de vigne sort de desfides finanziares. De önn en vers él i passa 2 agn de pandemia, olache al é gnü sbürlé rates o lascé dô cultes a imprejes y/o zitadins, che i Comuni n'á nia ciafé rotüdes deplën. Dal ater vers él sté de gran aumonc tai cosc, desco scialdé, forza eletrica, ciarburanc, mo ince aumonc fora de mosöra pai laürs da frabiché, olache al n'é nia süghertës sön i prisc.

I Comuni é te na smorzia y mëss jí a chirí soluziuns por finanziaé i proiec che ai ô realisé. Enschiö ince le Comune de Mareo, co á belo l'ann passé vonü sü locai tla „Ciasa Dolomites“ por finanziaé la sonta nea dla Crusc Blanca. Tla sontada de Consëi dai 29 de merz él gnü tut la dezijiun da **lizité ince les 1.726 aziuns che le Comune á dla Sozieté dai Lifc d'Al Plan**. Por che plü zitadins podess tó pert, él gnü scrit fora 16 pachec da 100 aziuns y önn da 126, pienn ia dal prisc minim de 361,44€ por aziun, tan co 36.144,00€ por en pachet da 100 y le total de 623.845,44€ por dotes les aziuns. Ala lizita publica á tut pert les sozietës d'Al Plan Skiarea Miara Srl y la Fujina Eletrica d'Al Plan Srl. Y spo ince la sozieté da Bornech Kronplatz Seilbahn AG. Dotes trèi á pité por düc i pachec de aziuns.

Les bustes dles ofertes é gnüdes daorides ai 9 de má ales 9:00 danmisdé, te salf de Consëi. **La maiú oferta é gnüda dala Kronplatz Seilbahn AG**, co á ciafé dotes les aziuns por la soma de 763.480,00€. En chël dé á la Junta ince aproé l'aiudicaziun definitiva. Desche le Consëi de Comune á fat fora belo denant, gnará na pert dai scioldi tuc ca por cumpré locai tla frabica nea dla Sozieté dai Lifc (raiun ex nodadoia), olache al roará ete i ambulatori dal dotur. I atri scioldi vën adorës por la condüta nea a Runcac.



Stüde iPM - Bornech: 33.223,37€ (contr. y IVA lapró) por la proietaziun definitiva y esecutiva, la direziun dai laûrs y la contabilité finala por le proiet "Laûrs de asfaltaziun sön strades comunales".

Sign. Sottas Andreas: 875,00€ plü IRAP por fá de mëndri laûrs de manutenziun sön la strada Rina - Pecëi - Tintal.

Stüde Kyklos Srl - Balsan: 19.170,00€ plü IVA por realisé la fasa 1 dal plann dla mobilité, co vá debojügn tla cornisc dal plann de svilup communal preodü dala lege urbanistica nea (Lege sön le Teritore y la Contrada).

Fireservice Spa - Bornech: 13.883,38€ plü IVA por laûrs de manutenziun encër i emplanc dal médefü pai frabicac de Comune.

Firma Mayr Josef Peter - Terenten: 23.040,00€ plü IVA por condü 1.152 m³ de material stabilisadü por le magazînn de Comune.

Geom. Palfrader Helmuth - Al Plan: 2.156,96€ (contr. y IVA lapró) por en plann de partizun por la cabina eletrica tal raiun d'espansciun y raiun turistic "Runcac".

Chiocchetti Luigi Srl - Moena: 1.600,00€ (IVA lapró) por desfiré jütades emplü dal ciomont bio, dertan la sajun da d'isté.

Frem Snc de M. Falceri y R. - Bergamo: 12.021,88€ (IVA lapró) por condü y mëter sö döes pumes por les eghes pazes a Longega.

Tapezaria Untergassmair de Craffonara Agata - Rina: 610,00€ plü IVA por sotrá en banch y 10 scagns te biblioteca d'Al Plan.

Kronservice Srl - Bornech: 878,40€ por laûrs da puzené te scolina d'Al Plan.

Stüde Sulzenbacher & Partner - Bornech: 1.268,80€ (contr. y IVA lapró) por fá en sorapost geologisch sön la strada d'La Miara y la strada da Frena. Cösc é jü debojügn dô che le rio tomp á gaujé roes y rotes.

Geom. Palfrader Helmuth - Al Plan: 1.687,50€ (contr. y IVA lapró) por en plann de partizun por la cabina eletrica pal raiun dal ciamp dal sport da Rina.

Komland Srl - Hafling: 17.281,98€ plü IVA por cuncé le camion, danejé pa en inzidënt dertan i laûrs da desaparé.

Fujina Elettrica d'Al Plan: 3.427,25€ plü IVA por cuncé la cabina eletrica tla localité "Gran Pré".

Taubau Srl - Vandoies: 12.487,67€ plü IVA por cuncé marciapîsc.

Holzer Srl - Türesc: 54.900,00€ plü IVA por fá laûrs de prescia sön la strada da Frena, rünada dal rio tomp.

Ingenier Terrabona Andreas - Bornech: 11.946,32€ (contr. y IVA lapró) por fá en stüde de fatibilité por realisé a La Pli en garasc con posé da parché en pert sot tera ete y plaza da trá le palé con jüc tla soraspersa.

Firma Erlacher Markus - Al Plan: 6.955,20€ plü IVA por realisé de prescia en mür de sostën sön la strada Pliscia - Peraforada Dessora, y 8.280,00€ plü IVA por realisé de prescia en mür de sostën a Pliscia, dlungia la cabina dal strom. La strada é gnüda rünada dal rio tomp.

Datatraffic Srl - Eppan: 13.646,00€ plü IVA por condü y mëter sö tlandri de strada (guardrail) a Framacia empede la sí de lën, desco damané dal Ofize Strades.

Geom. Palfrader Helmuth - Al Plan: 709,30€ (contr. y IVA lapró) por en plann de partizun por la plaza da parché dlungia le Cone.

Consorz dal'ega da bëre d'Al Plan: 5.737,71€ plü IVA por mëter jö en ró tla strada Ciasé, che le Comune pó adoré por la fira otica.

Alpenbau Srl - Terenten: 4.679,00€ plü IVA por fá asfalt tal zënter d'La Pli.

Segnaletica Stradale Ladina Srl - Vich de Fascia: max. 8.000,00€

DEFIBRILADUS TE MAREO



La corona dal defibriladú a Rina.

Defibriladus pó salvé vites y le Comune de Mareo se tol a cör la sügherté y la sanité dles porsones. Porchël él gnü fat fora da arjigné deplü coronas olache al gnará motü ete i defibriladus semi-automatics AED, co pó gní tuc ca tal cajo de debojügn (canche i án mené en stampa "Le Saltá" n'ea i aparac nia ciamó roës alerch). Les coronas é gnüdes motüdes sö te düc trëi i paîsc, plü avisa pomez ales entrades de scora y ciasa dles uniuns a La Pli, tal zënter da Rina, tal zënter d'Al Plan y önn dlungia le infopoint ta Pederü. An é sën tal laûr da arjigné i atac ala forza dal strom. Ta Pederü podarán se taché ete pla forza dla Cooperativa Turistica d'Al Plan.



Totem por le defibriladú ince ta Pederü, olache al röa adöm en gröm de jont.

CONTRIBUC CONZEDÜS A UNIUNS Y ISTITUZIUNS

UNIUN/ASSOZIAZIUN	CONTRIBUT	MOTIVAZIUN
Scora mesana d'Al Plan	5.060,00€	Material didatich 55,00€ x 92 scolari
Scores elementares dal comune	9.900,00€	Material didatich 55,00€ x 180 scolari
Scora taliana a Bornech	55,00€	Material didatich 1 sc.
Scora todëscia a Bornech	165,00€	Material didatich 3 sc.
Mosaic	200,00€	Contribut ordinar 2022
Cor dles Ėres Al Plan	200,00€	Contribut ordinar 2022
Cor „Col dla Vedla“ Rina	200,00€	Contribut ordinar 2022
Cor de Dlijia da Rina	800,00€	Contribut ordinar 2022
Cor de Dlijia d'Al Plan	800,00€	Contribut ordinar 2022
Cor de Dlijia d'La Pli	800,00€	Contribut ordinar 2022
Musiga d'Al Plan	1.600,00€	Contribut ordinar 2022
Musiga d'La Pli	1.600,00€	Contribut ordinar 2022
Musiga da Rina	1.600,00€	Contribut ordinar 2022
Stödafüs d'Al Plan	18.000,00€	Contribut ordinar 2022
Stödafüs d'La Pli	8.000,00€	Contribut ordinar 2022
Stödafüs da Rina	6.400,00€	Contribut ordinar 2022
Ploania d'Al Plan	14.000,00€	Contribut ordinar 2022
Ploania d'La Pli	8.000,00€	Contribut ordinar 2022
Ploania da Rina	3.000,00€	Contribut ordinar 2022
Sport Club Mareo	10.000,00€	Contribut ordinar 2022
Uniun Sport Rina	4.000,00€	Contribut ordinar 2022
ASKC Mareo - Chidlé	300,00€	Contribut ordinar 2022
Uniun Amatoriala Tennis Mareo	1.000,00€	Contribut ordinar 2022
Sci Club Al Plan de Mareo	6.000,00€	Contribut ordinar 2022
AVS Lia dai Crëp Mareo	500,00€	Contribut ordinar 2022
Consëi de Formaziun Al Plan	3.759,14€	Contribut ordinar 2022
Consëi de Formaziun La Pli	2.084,68€	Contribut ordinar 2022
Consëi de Formaziun Rina	1.013,30€	Contribut ordinar 2022
SKJ - Jogn d'Al Plan	300,00€	Contribut ordinar 2022
Jonëza da Paur d'La Pli	300,00€	Contribut ordinar 2022
Schira Jonila y Minis La Pli	200,00€	Contribut ordinar 2022
Sorvisc ai Jogn Val Badia	18.800,00€	Contribut ordinar 2022
Seniorenclub Al Plan	500,00€	Contribut ordinar 2022
Seniorenclub Rina	500,00€	Contribut ordinar 2022
Uniun de San Vinzenz	1.100,00€	Contribut ordinar 2022
Zënter Families Mareo	500,00€	Contribut ordinar 2022
Assügheraziun dai Tiers Rina	400,00€	Contribut ordinar 2022
Ass. dai Tiers La Pli - Al Plan	400,00€	Contribut ordinar 2022
Al Plan Events	20.000,00€	Copa dal Monn
Stödafüs d'Al Plan	2.000,00€	Liber dai 125 agn
Stödafüs d'La Pli	2.000,00€	Liber dai 125 agn
Sorvisc ai Jogn Val Badia	1.500,00€	Musical „Ujöp da Oies“
Stödafüs d'Al Plan	70.000,00€	Tanch nö
Stödafüs da Rina	20.000,00€	Auto nö



(IVA lapró) por deponjé la marcaziun dles strades a Al Plan y La Pli.

Firma Walter Weger Srl - Kiens: 12.000,00€ plü IVA por condü y mëter sö en emplant de aspiraziun pal frabricat dal sport Ciamaor.

Firma Obojes Markus - Valdaora: 1.930,50€ por condü scorzes por les plazes dai jüc.

Niederstätter AG - Balsan: 4.063,00€ plü IVA por tó en afit na mascïnn Radlader Kramer 8155.

Alpenbau Srl - Terenten: por fá laürs de ressanamont pal raiun dal ciamp dal sport da Rina, dô che al é sté danns dal rio tomp.

AL VËN PAIÉ FORA CUNC

120,00€ (IVA lapró) ala firma Klenkdesign d. Klenk Harald, desco spëises de raprezentanza.

300,00€ al Comune da Vahrn desco compartecipaziun por la scora mesana da Vahrn por scolari de Mareo co é laia, ann de scora 2020/21.

3.146,00€ ala Comunità Comprensoriala Val de Puster desco cuota a ciaria de nosc Comune por i cosc aministratifs y dal personal por le program de "Management Regional - Regionalmanagement" - perioda 2020 - 2022.

8.012,25€ ala Comunità Comprensoriala Val de Puster desco saldo por le sorvisc de assistonza a ciasa tla Val Badia, ann 2021.

3.000,00€ ala Università Lëdia de Balsan por la professôra convenzionata dal proiet "Turism y mobilité tal raiun alpin", tla Facolté a Bornech.

436,58€ al Comune de Badia desco compartecipaziun por la scora mesana d'La lla por scolari de Mareo co é enló, ann de scora 2021.

1.219,52€ al Comune da Bornech desco compartecipaziun por la Scora de Musiga da Bornech, por scolari de Mareo co é enló, ann 2022.

38.510,36€ al Comune de Badia desco spëises a ciaria dal Comune de Mareo por la gestiun dla Biblioteca Sas dla Crusc, ann 2021.

1.087,73€ ala Ajentöra dles Entrades - direziun provinciala da Balsan, por regularisé la posiziun fiscala dal Comune tal model 770/2019.

656,60€ (contr. y IVA lapró) al stüde BP & Partners - Corvara: le Comune á paié les spëises legales por na chestiun con la sig.ra Volpi Annamaria da Gussago (BS). Ara â prejenté na domanda de paiamont dai danns por en inzidënt che ara â albü ai 05.01.2020. Le Comune â fat la proposta de na acordanza extraiudiziara, por chëra che al é gnü assistí dal stüde da Corvara. L'acordanza n'é nia gnüda aledé y ensciö á le Comune paié les spëises d'avocat.

23.895,00€ ala Comunità Comprensoriala Val de Puster desco 1ª rata 2022 por le sorvisc dal ambient y sorvisc de assistonza a ciasa.

200,00€ al sign. Frontull Hubert por söa ativité da relevadú por la cumpëda dla jont y dles abitaziuns.

10.000,01€ (IVA lapró) ala firma Verginer Bau Srl & C. Sas da San Martin de Tor, por laürs de prescia fac tla localitè "Tlea".

Sorvisc da desparé: Al é gnü aproé da paié fora i cunc a saldo por les firmes co á fat sorvisc da desparé tla sajun da d'invern 2021/22. **Erich Palfrader** 36.478,00€; **Luca Promberger** 17.080,00€; **Manuel Rungger** 8.540,00€; **Heini Crazzolaro** 14.640,00€; **Verginer Bau Srl & Co Sas** 878,40€; **Ellecosta Hubert** 942,45€. Les somes é con IVA lapró

AMINISTRAZIUN

Anter le 2024 mëss i comuni s'arigné en plann de sconanza dal clima. Sön cösta á la Comunità Comprensoriala Val de Puster svilupé le proiet "**Sostën tla redaziun dai planns de sconanza dal clima - Regiun Clima y Energia**

de Puster", co prevëiga da ti dé ai comuni interessês sostën da arigné chisc planns, desco ince da laoré fora en plann dal clima y dal'energia a nivel de comunité comprensoriala. Tla sontada dai 7 de merz á la Junta fat fora da tó pert al proiet, y ince da tó pert al program de certificaziun ClimaLight. Tai agn 2022 cina 2024 é preodü cosc de endöt 16.327,00€, partis sö danter 6.032,00€ dal 2022, 5.147,00€ porom dal 2023 y 2024. Val' deplü ciafëise a plata 20.

Tla sontada dai 7 de merz é gnü aproé le sböz por le **contrat de barat danter Comune de Mareo y Craffonara Maria.** Ara nen vá de na retificaziun dal'iscriziun tavolara y catastala dla pdf 384/1 tal CC da Rina (ciasa dal Mone). Por cösc contrat ti á le Comune paié fora al stüde da notar Crepaz - Lanzi da Balsan la soma de 3.090,00€.

Tla sontada dai 7 de merz á la Junta aproé le **plann trienal por la prevenziun dla coruziun**, co é motü adöm da na relaziun sön i prighi, desco ince i provedimonc de prevenziun aladô.

A 9 impiegac ti é gnü conzedü da fá **ores sorafora en gaujiun dal referendum provincial** dai 29 de má, tal tomp dai 4 d'aorí ai 3 de jügn 2022, desco ince en gaujiun dal **referendum statal**, tal tomp dai 20 d'aorí ai 17 de jügn 2022. Por le pröm referendum é gnü paié fora na soma de 1.990,57€, por le secundo referendum 3.459,90€.

Tla sontada dai 11 d'aorí á la Junta aproé da slü jö en **contrat con la firma Sicos Srl da Predaia (TN), por la manutenziun dai emplant de videocontrol:** por le raiun dles scores 1.200,00€ plü IVA al ann; por le zënter de reziclaje 1.200,00€ plü IVA al ann.

La Junta á **arlungé le contrat de afit con le sign. Kanetscheider Giovanni**, por le cuatier de sorvisc nr. 2 tal raiun dles scores d'Al Plan. Le fit é de 425,00€ al mëns y le contrat vá dai 01.04.2022 fina ai 31.12.2025.

Tla sontada dai 20 d'aorí ti á la Junta sorandé **ala firma Verginer**

Martino Sas da San Martin de Tor le sorvisc de manutenziun ordinara y control periodich dai emplanc eletrics dai frabicac de proprieté dal Comune, por na soma de basa de 2.928,00€ al ann (IVA lapró). La medema firma á ince cialé la enciaria por **la manutenziun y control periodich dla iluminaziun publica**, por na soma de basa de 4.636,00€ al ann (IVA lapró). L'enciaria vá te entrá i caji dai 01.05.2022 cina ai 30.04.2025.

Tla sontada dai 10 de jená 2022 á la Junta fat fora da prejenté deboriada con i Stadtwerke da Bornech, le Comune da San Laronz y la Provinzia de Balsan en recurs dan le Tribunal Superiur dles Eghes Publiches, cuntra le decret dal assessur provincial nr. 21869/2021, con chël che al é gnü sciüré zoruch la domanda da anüzé ega dla Gadera por fá strom tai comuni de Mareo, San Laronz, Kiens, Vandoies, Redant, Mühlbach, Natz/Schabs, Lijun y Porsenú. Le Tribunal Superiur á endere sciüré zoruch le recurs con sentonza nr. 05-2022. Sön chëra á la Junta fat fora da **prejenté en recurs cuntra la sentonza, dan la Curt de Cassaziun**. I avocac Christof Baumgartner da Bornech y Andrea Manzi da Roma é gnüs enciariës da defëne les rajuns dal Comune.

Tla sontada dai 2 de má á la Junta aproé **le sböz dal contrat de barat danter Comune de Mareo y le sign. Willeit Walter**, motü adöm dal stüde da notar Paolo Stefani - Bornech. Por le contegnü dal barat, podëise ciaré tal ultimo Saltà, aplata 18. Por le contrat i é gnü paié fora 1.339,23€ al stüde da notar Stefani - Scaramellino - Ockl - Kaufmann.

Tla sontada dai 16 de dezëmbre 2021 á la Junta fat fora da se lascé ete tla stritaria dan signoria por en recurs fat por l'anulamont dla delibera de Junta nr. 352/2021. Ara nen vá dla esclujun dal recorënt dala gradatöra por le frabiché alesiré. Dô la sentonza dal Tribunal aministratif é le Comune gnü condané da paié les somes dal prozes, porchël é gnü fat fora da **i reconëscer al stüde legal av. Monica Bonomini da Balsan** le dërt da encassé la soma de 5.027,36€ (contr. y IVA lapró).



Mapa dla pista "Seewiese", fora dla documentaziun dal stüde proietant IPM da Bornech. Les perts con punc checi mostra l'ampliamont.

Tla sontada dai 2 de má á la Junta aproé **le sböz dal contrat de afit dal sub 10 dla pdf 934 tal CC de Mareo (locai dla Ciasa dai Pici) con la Cooperativa Soziala "Casa Bimbo - Tagesmutter ONLUS"**. La spersa afitada ia é de 237 m², le contrat de afit á na dörada de 24 mënsch, dai 01.01.2022 cina ai 31.12.2023. Le fit vën fissé sön 1.688,75€ al ann. Te cösta zifra n'él nia lëite les spëises desco scialdé, forza eletrica etc. Cöstes vën adebitades a pert.

La Junta á slüt jö **con la firma Liftkom Spa da Kiens en contrat de manutenziun por le lift dla scora mesana**. Le contrat vá trëi agn, dal 2022 al 2024, por la soma de 950,00€ plü IVA al ann.

La Junta á slüt jö en **contrat d'afit con la Vijnanza da Framacia Dessot**, por perts dla pdt 2346 olache al é lassora le marciapisc y la fermada dal bus nea "La Crëpa". Al é gnü fissé en fit de 60,00€ al ann.

Tla sontada dai 13 de jügn é gnü fat na delibera de prescia por na **müdaziun al bilanz de previjiun 2022 y ajornamont dal Documont Unich de Programaziun**. La müdaziun s'avalieia sön la soma de 84.653,46€. Al é en spostamont danter capitui, olache cösta soma é gnüda motüda tal capitul dai laürs fac pal ciamp dal sport d'Al Plan.

Por gauja che al é müdé les firmes co fej le sorvisc de trasport publich, á la Junta ince mossü müdé la delibera dla **convenziun con la Provinzia, co reverda le sorvisc dal Mareobus. Al é gnü adaté les somes**, co é sën de 28.433,46€ ala SAD y 57.748,86€ ala dita Taferner.

Tla sontada dai 21 de jügn á la Junta aproé **le proiet dla sozieté Kronplatz Seilbahn AG, por l'ampliamont y l'adatamont dla pista dai schi "Seewiese"**, co passa en pert sön terac de Mareo. Cösta pista pëia da sön som Plan de Coronas jö tla pert a nord-vest y oj spo a nord-ost por roé cina dla staziun amez dal emplanc "Kronplatz I+II". Le proiet prevëiga da deslarié la pista sön na lunghëza de 534 metri, por roé a na larghëza minima de chi 25 metri. Por i laürs vëgnel taié lëns sön za. 1.000 m² y la pista vën ampliada de chi 0,42 hectars. La pista é spo na foscia. I cosc dai laürs vën sciazës sön 50.000,00€. Le 2%, tan co za. 1.000,00€ mëss gnü tuc ca por mosöres de compensaziun, co jará te cösc cajo a bën dles strotöres, sëmenes y trus sölë post.

Tla sontada dai 4 de messé é gnü aproé **na müdaziun de prescia dal bilanz de 60.000,00€**. En spostamont danter capitui: al é gnü motü scioldi por la sistemaziun dla plaza dles scores d'Al Plan.



Ampliamont dla strotöra "La Para" sö Sarjëi, La Junta á aproé le pröm provedimont por le plann de atuaziun. (Foto: documentaziun dr. arch. Call Ruth)

Ai 4 de merz 2022 á le Ministër dal Turism publiché en avis por envié i comuni da mené ete proiec co prevëiga la valorisaziun turistic-culturala dai teritori co é te raion UNESCO (endöt toma ete 78 comuni). I Comuni dal teritore mëss prejenté les domandes de finanziamont deboriada. Sön iniziativa dal Comune d'La Pli de Fodom é porchël gnü motü jö en avis publich por enrescí ince i Comuni co ô fá empara. Al é gnü laoré fora na acordanza, co prevëiga ince en comune capofila. La Junta de Mareo á aproé ai 4 de messé cösta acordanza, olache le Comune d'La Pli de Fodom vën motü desco comune capofila; ai 13 de messé é ciamó gnü aproé l'idea dal proiet, olache al vën descrit contegnüs, strategia y carateristiches dai intervonc y dles finalitës.

URBANISTICA

Sön domanda dal sign. Erlacher Benedikt, á la Junta aproé la desviaziun al'oblianza dal respet dles destanzes legales dla pdt 4147/2 de proprieté dal Comune (loc. Matlogn), por trá jö le frabricat agricul sön la pdf 69/1 co é dër en malester y le fá sö danö sön la pdt 644/1, che le sign. Erlacher cumpra dal sign. Martin Obermair y co fajará spo pert dla pdt 646 de söa proprieté. Dötes les parzeles é tal CC de Mareo.

Müdaziun al plann de ressanamont dal raion abitatif "A7" - Sportcenter Mareo - 1. provedimont 14.02.2022, 2. provedimont 05.04.2022

- Partiziu dles cubatöres tal löt B;
- Müdaziun dla destinaziun de na pert dla cubatöra sön le löt B da "abitaziuns convenzionades" a "prestaziun de sorvisc";
- La cubatöra por la prestaziun de sorvisc passa da 15.931 m³ a 16.791 m³.
- La cubatöra dles abitaziuns convenzionades passa da 1.145 m³ a 285 m³.

Aproaziun dal plann de atuaziun co reverda les ppdf 740 - 378 y la pdf 3099/10 tal CC de Mareo - raion abitatif B1 - raion de completamont - 1. provedimont 05.04.2022 (Junta), 2. provedimont 27.05.2022 (Consëi)

Le 1. provedimont por cösc raion ea belo gnü fat ai 26.01.2022, mo le Comune á trat zoruch la delibera por en fal material. Enschió é l'iter pié ia danö, la sostanza ne se müda nia. Ara nen vá dal raion co tol ete la Villa Rezia y le Garní Erna. Na spersa de 1.409 m² con en indesc de cubatöra de 1,9 m³/m². Al é gnü damané y aproé da enjunté na ligna de frabricaziun mascima fora de tera. Lapró é gnü definí l'altëza mascima de 11 metri por le löt da frabiché "A"

LES NOZES ZIVILES

Con le passé dai agn é les nozes ziviles gnüdes tres deplü. Cöstes nozes con l'at ofizial vën tignides de regola te Ciasa de Comune. Tai ultimi agn án odü che al vën ete tres plü domandes da tigní la noza fora de Ciasa de Comune. La Junta á porchël definí i posc olache ares pó gní tignides, plü avisa Fanes, Senes, Fodara Vedla y Tamersc. Emplü é gnü fissé por cöstes desvianzes na tarifa de 800,00€, co val por residënc y nia residënc. La Junta á ince müdé l'art. 2 dla delibera nr. 76/2019, olache al ea gnü definí perodes che les nozes ziviles ne vën nia tignides. Sën é la poscibilité da zelebré les nozes ziviles ince tles perodes dai 20 de dezëmber ai 7 de jená, tla edema dan y te chëra dô Santa Maria dal Cjöf, desco ince de sabeda. Cösc n'ea denant nia conzedü.



Fabian Feichter y Youlee Ku da Seoul tla Corea dal Süd á tigní de jügn na noza zivila tai Tamersc.

SE TIGNÍ ENFORMÈS

L'Aministraziun de Comune recorda les poscibilitës da se tigní tres enformës sön les noeles de Comune. Cösc pón fá con l'iscriziun ala **newsletter**, se scrienn ete ai canai social **Facebook y Instagram dal Comune**, desco ince tres l'aplicaziun **Gem2Go** dal Consorzi dai Comuni. Enschió é meso da ciafé les noeles debota y avëi les enformaziuns de Comune diretamonter te gaiofa.

(Villa Rezia) y l'altèza mascima de 12 metri por le lôt "B" (Garní Erna). Por i planns dal dagnì co reverda les frabiches sön les parzeles 378 y 740 á la Comisciun por le teritore y la contrada definí che al ne pó nia gní fat tēc plac.

Aproaziun dal plann de atuaziun dal raiun por emplanc turistics d'alberch "La Para", pdf 1033, pdt 2716 tal CC de Mareo - 1. provedimont 09.05.2022

Sön domanda dal sign. Mutschlechner Felice él gnü aproé le plann de atuaziun por le raiun soradit, tla localitè "Sarjëi". Aladò dla relaziun tecnica dla dr. arch. Call Ruth se tratera de na spersa de 2.262 m², olache al é preodü en indesc de cubatöra de 1,50 m³/m². Al pó porchël gní realisé na cubatöra de 3.393 m³. Pa cösta él belo lèite la cubatöra dal restorant B&B "La Para de 1.662,90 m³. Le patrun prevèiga en ampliament dla strotöra, co dess roé a 25 posc da dormí con standard de almanco 4 stères.

Müdaziun al plann normatif dal raiun d'espansciun "C1 Les Corcelles" revardont i lôc alesirès "G1" y "G2" - 1. provedimont 30.05.2022

Sön domanda dai sign.s Frenner Eduard y Regensberger Hildegard él gnü dé pro a na müdaziun al plann normatif, co prevèiga da completé les normes d'atuaziun denn dant che por i dui lôc él conzedü da apliché le bonus energia; lapró él gnü dé pro da alzé l'altèza mesana dai frabicac da 9 a 10 metri.

Con delibera nr. 241/2020 á la Junta aproé da envié ia la prozedöra d'espropriaziun dles parzeles 822/7 y 822/9 tal CC de Mareo (localitè "Rü"), por le raiun d'espansciun nö "Rü" a La Pli de Mareo. Tla sontada dai 30 de má 2022 é cösta delibera gnüda revocada, deache al s'á müdé i raporc de proprieté, y al é gnü fat fora da jí ennant y cumpré tres l'espropriaziun la parzela nea pdt 822/8 dal CC de Mareo.

Müdaziun al plann urbanistich dal Comune de Mareo sön la pdf 1477 tal CC de Mareo - picio ampliament dal "raiun residenzial

B1 - raiun de completamont" tla strada Antersí

Sön domanda dai sign.s Ties Claudia y Kaneider Heinz á la Junta aproé en picio ampliament dal "raiun residenzial B1 - raiun de completamont" dô la strada Antersí". Döta la parzela dai damanadus é de 625 m², de chi che 420 é portès ete desco raiun de completamont. L'ampliament prevèiga da mèter pomez na picia stricora de 98 m². Con l'indesc de cubatöra de 1,90 m³/m² él ensciö la poscibilitè da realisé na cubatöra emplü de 186,20 m³. I damanadus i paia al Comune la soma fata fora de 18.375,00€, co corespogn al'oblianza dal Comune da trá ete le 30% dal valur de marcé (sciazé sön 625,00€ al meter cuadrat).

PERSONAL

Con delibera nr. 33/2022 á la Junta scrit fora en **concurs publich por la formaziun de na gradatöra publica por le post de na assistont/a aministratif/va tla VI. cualifica funziunala**, con contrat a tomp indeterminé. Tla sontada dai 14 de merz 2022 él gnü aproé l'amisciun dai candidac, plü avisa la **sign.ra Rubatscher Margareth**. Le medemo dé él ince gnü nominé la comisciun de valütaziun, metüda adöm dala secreteria de Comune dra. Verena Ellecosta desco presidènta, y i mèmberi Alfons Facchini – assistont aministratif y Roberto Castlunger - funziunar aministratif. **La candidata á slüt jö le concurs con 83,27 punc sön 100 y é spo gnüda tuta sö desco colaboradèssa de rode**, pienn ia dai 2 de má 2022.

Plü gonot él tomé fora personal o cöghes te scores o scolines dal comune de Mareo. Por garantí ennant le sorvisc á le Comune mossü tó sö cöghes por val' dis, con contrac a termo. La **sign. ra Fiung Erica** é gnüda tuta sö dai 18 ai 22 y dai 23 ai 25 de merz desco cöga por la scora mesana d'Al Plan; la **sign.ra Sottara Luisa** é gnüda tuta sö dai 21 ai 25 de merz, dai 5 ai 12 y dai 13 ai 17 de má, desco sorvidèssa dla scolina d'Al Plan; la **sign. ra Runggaldier Margot** é gnüda tuta sö dai 20 ai 25 de má desco sorvidèssa dla scolina d'Al Plan.

TREC Á DAIDÉ ROMENÉ SÖ



Le comitè dai jogn á organisé le Dé dal Ambient 2022. I jogn á sambèn daidé empara.

Ince sce le tomp ea malsogü, él empó sté chës 175 porsones co á tut pert al "Dé dal Ambient 2022", manifestaziun organisada dal Comitè Comunal por la Jonèza, en colaboraziun con i Stödafüs dai trèi paisc, les scores elementares y la mesana, le Comune y la Cooperativa Turistica. Le dé é gnü organisé la sabeda ai 7 de má y ince en cösc iade éra jüda da romené i paisc da en gröm de refodam co vèn sciüré o lascé por encèrch. Fazorí de papier, ciches de zigarec, cartuns, angostares de plastica y de spidl, mo ince foracia de vigne sort, montli y cinamai cuertli de seles. Le Comune oress rengrazié dotes les porsones co s'á tut le tomp da gní a daidé y co á ensciö contribuí da lascé zoruch nüsç paisc en pü' plü šaubri. Dô le laür dal danmisdé, á düc ince ciafé val' da mangé y da bëre.



Na bela cumpèda de sac coüs adöm a Rina.

Le colaboradú sign. Castlunger Roberto é gnü nominé responsabl por la culta comunala de sojornanza (imposta comunale di soggiorno por strotöres turisticas, Ortstaxe), y por la culta IMI. **La colaboradëssa sign.ra Margareth Rubatscher** desco responsabla por la culta de sojornanza (imposta di soggiorno).

Le colaboradú sign. Mutschlechner Alex é gnü nominé responsabl por la SUAP - portina unica por ativitës produtives.

Con delibera de Junta nr. 377 dai 08.11.2021 èl gnü scrit fora en **concurs publich por tò sò en/na funzionar/a aministratif/va con diplom de laurea** de almanco trëi agn, tla VII cualifica funzionala. En post a tomp plën, resservé al grup de lingaz ladin (ciara ince ultima ediziun dal Saltà). Tla sontada dai 21 de merz 2022 èl gnü nominé la davagnadëssa, co é **la sign.ra Pezzei Patrizia. Èra á arjunt 84,06 punc sòn 100 y é spo gnüda tuta sò desco colaboradëssa de rode**, pienn ia dai 2 de má 2022.

Tla sontada dai 5 d'aorí á la Junta scrit fora en **concurs publich por la formaziun de na gradatöra publica por tò cò con contrat a tomp indeterminé 1 assistont/a aministratif/va tla VI. cualifica funzionala**. Le laür é a tomp plën, resservé por porsones dal grup de lingaz ladin. Tla sontada dai 9 de má èl gnü amotü desco candidata sora **la sign.ra Clement Gabriela** y spo nominé le comisciun de valütaziun, motüda adöm dala secreteria de Comune dra. Verena Ellecosta desco presidënta, y i mëmbri Patrizia Pezzei - funzionara aministrativa con diplom de université, y Alfons Facchini - assistont aministratif.

Al/a colaboradú/dëssa con matricola nr. 209 i èl gnü smendrí le raport de laür dal 80% al 60%, pienn ia dai 01.04.2022. Lapró i èl gnü arlungé le contrat de laür cina ai 30 de jügn 2022.

Tla sontada dai 5 d'aorí á la Junta azeté **les dimisciuns voluntares dal/dla colaboradú/dëssa con matricola nr. 144**. So ultimo dé de laür é sté ai 31 de merz.

Al/a colaboradú/dëssa con matricola nr. 82 i èl gnü paié fora en acunt dal tratamont dla fin de raport de 12.619,95€.

Al/a colaboradú/dëssa con matricola nr. 147 i èl gnü conzedü la perioda de feries por maternité d'oblianza, por la dörada de 5 mënsch, pienn ia dai 30 de messé 2022.

Al/a colaboradú/dëssa con matricola nr. 304 ti èl gnü arlungé le contrat de laür desco assistont/a aministratif/va tla VI cualifica funzionala - ofize lizonzes - dai 01.07.2022 cina ai 31.12.2022, con contrat a tomp parzial (50%).

Al/a colaboradú/dëssa con matricola nr. 137 i èl gnü paié fora le tratamont dla fin de raport de 13.370,31€.

Le/la colaboradú/dëssa con matricola nr. 303 é gnü/da autorisé/ada da fá na ativité de davagn fora dal orar de sorvisc, plü avisa por la "Maratona dles Dolomites".

Le/la colaboradú/dëssa con matricola nr. 212 é gnü/da autorisé/ada da fá na ativité de davagn fora dal orar de sorvisc, plü avisa desco fotograf y paur.

Al/a colaboradú/dëssa con matricola nr. 204 i èl gnü reconesciü dai 1. de messé ennant na indenité emplü dal 18% por les enciaries sorapro desco responsabl/a dla unité organisativa y responsabl/a dal prozedimont.

La colaboradëssa Patrizia Pezzei é gnüda nominada desco sostituta responsabla dal Ofize Personal, pienn ia dai 30 de messé 2022.

La sign.ra Clara Marion é gnüda tuta sò desco assistont/a aministrativa tla VI cualifica funzionala, con contrat a tomp determiné y parzial (60%).

AMINISTRAZIUN DESPARTIDA BUC

Sontada dai 21 de merz 2022
- Al é gnü aproé le **cunt consuntif** d'Aministrazion Despartida BUC por l'ann 2021. Le fond de cassa ai

SONTA LITALA SPOSTADA

Eniann da d'aisciöda áanse albü dui referendums. De má èl sté da lité por le referendum provincial olache ara nen jea dla lege sòn la democrazia direta, de jügn ára spo toché da dé jö la usc por i 5 referendums nazional söla iustizia taliana. Por i litadus d'Al Plan èl sté na novité. Por le pröm iade ésaí jüs a dé jö söa usc tla sonta litala nea, tai locai dla scora de musiga. Denant litân te scora mesana.



Pai referendums eniann da d'aisciöda án lité le pröm iade te scora de musiga.

31.12.2020 ea de 39.866,95€. la por l'ann èl gnü ete 120.914,81€ y jü fora 89.414,92€. Le fond de cassa ala fin dal 2021 resultëia de 71.366,84€, con lapró resc atifs de 14.332,00€ y resc passifs de 43.516,20€. L'avanz d'aministrazion é de 42.182,64€.

- **La Tislaria Feichter d'La Pli** é gnüda enciariada da baraté fora na finestra rota pla ciasa dal daz ta Fodara Masarönn, por la soma de 432,32€ plü IVA.

Sontada dai 8 de jügn 2022
- **Al é gnü aproé da paié fora deplü cunc:** 44,16€ ala Fujina Elettrica d'Al Plan; 561,00€ + 181,50€ al Südtiroler Bauernbund por la comembranza y assügheraziun 2022.

- **La firma Verginer Srl** é gnüda enciariada da fá laürs söla strada Pederü - Senes, por 7.702,00€ plü IVA.

Sontada dai 13 de iuli 2022
- **Al é gnü aproé da paié fora deplü cunc:** 12,08€ ala firma Aruba por la PEC; 44,16€ ala Fujina Elettrica d'Al Plan, 406,26€ al Stüde Verginer Se.Ve.

I án dé jö 711 mile kg de refodam

Val' curiositês sön les cuantitês de refodam dades jö tal zënter de reziclaje tal 2021. Confrunt con l'ann 2019, co n'ea nia ciamó sté condizioné dal Covid

Tan de refodam áanse pa dé jö tal zënter de reziclaje dal 2021? Avisa 710.900 chili. Cösc é ci che i liun tles listes ofiziales. Sc'i partium sô la cuantité danter i 3.146 abitanc che nosc comune cumpedâ ala fin dal 2021, rounse sön na mesaria de feter 226 chili a ce. Cösta zifra é endere mâ indicativa, deach'al mancia le ciomont ch'i prodüjun plü diretamonter, chël de cîasa. Sc'i ti ciarun ales sorts de ciomont, spo él le spidl co fej fora la maiú sona. Dal 2021 n'ánse dé jö 152.400 chili. Al vën spo al secundo post le cartun con 92.220 chili y en pü' a sorpresa le refodam vërt, tan co les brüsciaries, co munta sô a 90.690 chili. Le ciomont con resc de materialai vën al cuarto post con 70.060 chili.

Enteressant él da fá en confrunt con i dac che i án publiché tal Saltá sön le 2019. Enló êl gnü dé jö te nosc zënter de reziclaje 799.256 chili de refodam, tan co 88.356 chili deplü co dal 2021. Cösc é dessogü da ti atribuí en pert ala situaziun cole Covid, olache al é tomé fora la sajun da d'invern. Tai pröms mëns dal ann n'él sté nia de davert y sciori n'á nia podü gní alerch, porchël n'él gnanca gnü prodüt le ciomont aladô.

Cösc selascia odëidër bunpal spidl, olache al é sté dal 2021 passa 45 mile chili demanco; ince le refodam bio é caré de feter 39 mile chili, y spo le cartun, co é jü zoruch de passa 27 mile chili. Cösc é döt ciomont co taca adöm plü diretamonter con la gastronomia: angostares te hotí

y ostaries, les laadöres co romagn dessorora pai pasç, le cartun por fá ia les gran cuantitês de mangiaría che les botèghes cumpra y che i ostis apostëia. Söpert é jüda la cuantité de chël refodam co taca plü adöm con la jont dal post, desco le lignan - corsciü de passa 15 mile chili, les brüsciaries, jüdes sô de passa 13 mile chili, o ince i resc de material, jüs sô de feter 5 mile chili.

Demanco o deplü che al sides, al vën fora ann por ann na bela cuantité. Dal ater vers desmostrea ince che i án bona orenté da despartí le ciomont y da le desgorje olache al toca. Con le zënter de reziclaje á le Comune arjigné en bel sorvisc, co ti é d'öga a dōta la popolaziun y che i sun ince enviês da anüzé.

SORT DE CIOMONT	Chili 2019	Chili 2021	Desferonzia
Toner stampantes	89	113	+24 kg
Eri de mascínns	515	1.473	+958 kg
D'atri ciarburanc	56	---	-56 kg
Cartun	119.600	92.220	-27.380 kg
Plastica	23.260	16.810	-6.450 kg
Bossi	17.840	13.740	-4.100 kg
D'ater material	7.160	7.160	+/- 0 kg
Spidl	197.780	152.400	-45.380 kg
Ciomont da tosser	368	118	-250 kg
Resc de material (ziegli, platines, ceramica)	65.340	70.060	-4.720 kg
Papier	66.190	54.640	-11.550 kg
Refodam bio	85.100	46.430	-38.670 kg
Aji	---	27	+27 kg
Löms y neon	223	287	+64 kg
Eri y grasc	3.920	4.720	+800 kg
Corusc y d'ater ciomont prigrus	912	1.764	+852 kg
Patüc da puzené	135	102	-33 kg
Medejines tomades	924	55	-869 kg
Patrîs	840	918	+78 kg
Aparac eletrics	15.444	19.410	+3.966 kg
Lignan	20.320	35.480	+15.160 kg
Fer	36.500	43.620	+7.120 kg
Brüsciaries, refodam vërt	77.420	90.690	+13.270 kg
Refodam grô	59.320	58.340	-980 kg
Endöt	799.256	710.900	-88.356 kg

CONZESCIUNS DE MERZ 2022

Frontull Carlo	Trá jö y fá sô danö y arjigné garasc tal limo dla cubatöra esistonta tal raiun de recuper „A - Al Plan de Mareo“	Al Plan Str. Valiares
Palfrader Angelo, Palfrader Raimund, Palfrader Rosa, Pedevilla Alfonso	Mëter apost les frabiches sön la pdf 77 tal CC de Mareo	La Pli Str. Soröa
Hypo Vorarlberg Leasing Spa Meyer Michael Palfrader Erich	Costruziun d'en têt sön le lôt B4 dal raiun industrial „Gran Pré“	Al Plan Str. Gran Pré
Ploania d'Al Plan	Ressanamont dal mür de cortina y dla soraspersa dla cortina vedla	Al Plan Str. Catarina Lanz
Rigo Marcus	Trá jö y fá sô danö le frabicat agricul tla localité Matlogn	Curt Str. Rara 2
Erlacher Benedikt	Trá jö le frabicat agricul sön la pdf 69/1 y le fá sô danö sön la pdf 644/1 tla localité Matlogn	Curt Str. Rara
Mühlmann Barbara	Varianta pal proiet de ressanamont y dörteraziun de trus de campagna pal lü slüt „Baldessé“	Pliscia Str. Pliscia
Kastlunger Maurizio Willeit Alma	Ampliamont dla ciasadafü y dai sorvisc sanitar pal restaurant „Fana Ladina“	Al Plan, str. Plan de Coronas 10
Comune de Mareo	Varianta pal proiet de costruziun dal frabicat con le local dla Musiga d'La Pli	La Pli Str. La Pli
Mutschlechner Stefan	Müdaziun dla destinaziun dla P.M. 10 sön la pdf 331/2, da botëga a bar - Ciasa Post Stern	Al Plan Str. Catarina Lanz 36
Bedin Daniel	Costruziun d'en depot por massaries, d'en magazînn y en local de recreaziun pal cantier dal Sorvisc Strades	Mantëna Str. Mantëna
Trebo Ferdigg Anna Srl	Varianta pal proiet de ressanamont y müdaziun dla frabica	Al Plan Str. Fanes 1
Trebo Ferdigg Anna Srl.	2. varianta pal proiet de ressanamont y müdaziun dla frabica	Al Plan Str. Fanes 1

CONZESCIUNS DE AORÍ 2022

Hotel Condor Sas	Domanda da podëi fá laürs pal têt co stá fora sön la pert a süd dal hotel	Al Plan, str. Plan de Coronas 13
Ispetorat Forestal da Bornech	Trá jö y fá sô danö en têt por material	Al Plan Str. Val dai Tamersc
Pedevilla Stefan	Trá fora ciüc y modelé danö la tompla ppdt 1682/8, 1847, 1848 (localité La Munt)	La Pli Str. Ciaseles
Ties Emanuel	Lascé jö material da ciaé y splané sön perts dles parzeles 3387/1, 3382/1 y 3384 (loc. Râs - Val de Costata)	Al Plan Str. Plan de Coronas
Ties Alexander, Ties Jutta, Ties Kornelia	Restruturaziun dal frabicat co é belo y costruziun de posc da parché pomez	Mantëna Str. Mantëna
Obergasser Hilda Maria Ties Giuseppe, Ties Verena	Varianta pal proiet de ampliamont y restruturaziun dla ciasa tal raiun d'espansciun „Chi Trêi“	Al Plan Str. Paracia 39

CONZESCIUNS DE MÁ 2022

Ties Stefan	Splané le pré, ressané y amplié en tru de campagna (loc. Runch de Col)	Al Plan
Call Silvia	Ampliamont dal frabicat agricul sön la pdf 1330 y trá jö le frabicat sön la pdf 380	Al Plan Str. Al Plan Dessora 13
Mutschlechner Peter Pitscheider Petra	Varianta pal proiet de costruziun de döes ciasas d'abitaziun sön le lôt F1b tal raiun d'espansciun „C1 - Corn“	Al Plan Str. Les Corceles
Sozieté dai Lifc d'Al Plan	Ampliamont dla staziun da pumpé „Sorega“ a Al Plan	Al Plan Str. Sarjëi

CONZESCIUNS DE MÁ 2022

Palfrader Hubert	Costruziun de na fujina da zumpradú con trá jö le frabicat agricul sön le lü slüt „Col Sora Curt“	Curt Str. Rara 8
Comune de Mareo	Costruziun dla rëi de fira otica tal païsc da Rina	Rina Str. Rina

CONZESCIUNS DE JÜGN 2022

Pedevilla Stefan	Trá jö y fá sô danö le ciasa d'abitaziun sön le lü „La Munt“	Pliscia Str. Ciaseles 14
Comune de Mareo	Costruziun dles infrastrotöres primares dal raiun d'espansiun „C5 - Runcac“ y dai raiuns por infrastrotöres turistiches y d'alberch „Runcac“ y „Runcac I“, y costruziun d'en coletur dles eghe blanches y fosces	Al Plan Str. Catarina Lanz
Arnolds Srl	Renové i parëis dla veranda pal restaurant „Arnold's“	Al Plan Str. Catarina Lanz 65

CONZESCIUNS DE MESSÉ 2022

Frenner Georg	Restruturaziun y manutenziun straordinaria dla ciasa d'abitaziun dal Lü de Pincia	Mantëna Str. Mantëna 1
Barbantini Paolo Valerio Punturieri Antonio Punturieri Giulia	Restruturaziun pla p.m. 5 dla pdf 1016 tal CC de Mareo con la costruziun d'en ghibl	Al Plan Str. Catarina Lanz 4
Scora dai Schi d'Al Plan	De pici laürs de restruturaziun tl'alzada a tera y pla falzada d'entrada pla P.M. 1 y 2 dla Ciasa Dolomites	Al Plan Str. Catarina Lanz 14/2

PRËIBEL SPARAGNÉ EGA

Na sèciora co dōra belo da en pez, pūces prezpitaziuns tles ultimes edemes, desco ince d'invern y da d'aisciōda, temperatōres sora la mesaria tal prōm mez ann y nia enultima la pūcia nēi tomada tles munts, á porté a na emergēnza d'ega tal raiun dal Adesc y dandadōt tal Venet, olache an é roēs te dificolts con la fornidōra d'ega. Dlungia la ciarestia d'ega s'enjuntel le fat che le bojūgn foss ciamó maiú co i atri agn, dandadōt por l'agricoltōra, por gauja dal gran cialt. Por evité ciamó de maius danns, p.ej. che l'ega sarada dal mer se tiri tres plü ete y sō por le flus dal rü, mēss la portada minima dal Adesc ester de 80 m³/s pla staziun de mosōraziun de Boara Pisani. Por garantí la portada minima s'á ince Südtirol motü a desposiziun da fá sōa pert por sostegní les regiuns ijines. Rodunt porchël á le presidēt dla Provinzia Arno

Kompatscher dé fora ai 12 de messé 2022 na ordinanza con provedimonc por smendrí l'emergēnza d'ega. **Chisc valará cina a revoca** y i sun dūc bel periēs da i tigní ete:

a) I anūzadus d'ega, en particular l'agricoltōra y chi co á urc o parcs, é dassēnn enviēs da sparagné ega y l'adoré te na maniera efiziēnta, por

consumé le manco che ara vá.

b) Al é da limité le plü che ara vá da bagné les sperses vērdes publiche o turistiches. Cōsc é a vigne moda proibí dales 9:00 ales 20:00.

c) I emplanc da bagné tl'agricoltōra (cōsc n'atoca nia nosta valada) ne pó nia gní adorēs danter les 10:00 y les 18:00.



Ince le Lé de Limo (fat jö ai 02.07.) sont ch'alé sté pūcia nēi d'invern. (Foto: Daniela Ellecosta)



Pla encuntada con la popolaziun a Rina. Cotan de jont é gnüda a ascuté sö.

L'Aministraziun encunta la jont

D'aorí é gnü tigní a Al Plan, La Pli y Rina les encuntades con la popolaziun, olache l'Aministraziun á enformé sön laürs fac y sön chi che an se tol dant da fá

L'ultima encuntada dl'Aministraziun de Comune con la popolaziun ea stada de dezëmber dal 2018. Da d'altonn dal 2020 é spo gnü lité danö le Consëi de Comune y endertant é ince le Covid co moscedâ empara. Ensciö án mossü aspeté cina da d'aisciöda dal 2022 por tigní endö les encuntades en presonza. Dai 20 ai 22 d'aorí ésera stada tan ennant. L'Ombolt y i Assessurs de Comune á encunté la jont d'Al Plan, La Pli y Rina por enformé sön l'ativité.

Deach'al ea la pröma encuntada por l'Aministraziun nea, é empröma gnü prejenté le Consëi y la Junta, spo á l'Ombolt cunté dles desfides che cösta Aministraziun nea á albü da afronté belo dal mëterman encá sön deplü frunc. **Sanité:** D'otober 2020 án motü man la legislatöra che an á da scíampí con zifres valgamia altes dal Covid, co s'á spo ince damané l'organizaziun snela de plü aziuns, desco la gran aziun de tesć sön döta la popolaziun, spo plü ennant le zënter dai tesć y le bus dles variores. **Tomp:** Tal invern 2020/21 é gnü noëres olache al é sté emergënzes tles viles d'La Pli, con ciases co ea al prigo da loines. Dal 2021 é gnü lapró danns dal

ont y la emergënza tai bosc con le chefer dla scorza. **Cosc:** Eniann de forá á motü man la vera tla Ucraina, y deboriada con speculaziuns é gnü aledé de gran aumonc de cosć, olache i Comuni röa en dificolté da finanzia laürs, co costa sën en gröm deplü. Nia enultima stontun da ciafé i material y ince les dites co fej i laürs. **Personal:** L'Aministraziun á reorganisé i ofizi de Comune por che an podess pité i sorvisc te na maniera plü efiziënta y ince da sté saorí por i colaboradus. Tal medemo tomp é sté da gestí tres endö caji de personal co tomâ fora, personal co á dé les dimisciuns, personal nò tut sö. Situaziuns nia dagnora saorida da desgropé, olache Ombolt, Assessurs y Aconsiadus á ciaré deboriada con i colaboradus da ti ester manëcia. Nosc Comune cumpëda al momont 26 colaboradësses y colaboradus: 4 laoranti de Comune, 1 polizist, 12 colaboradus y colaboradësses tl'aministraziun, 9 cöghes o ëres co puzenëia.

LA SITUAZIUN ECONOMICA

L'Ombolt á ilustré plü avisa cares co é les dificoltés da desgropé a nivel economich. Por le Covid é gnü lascé dô cultes o che al é gnü

sposté les rates. Lapró á la Provinzia smendrí i contribuc por investiziuns, resp. sbürlé a plü ennant les rates. Y emplü vëgnel frabiché demanco - de önn en vers por les dificoltés y malsüghertës con la lege urbanistica nea, de l'ater vers por i cosć dal frabiché dër alc. Döt adöm scioldi co vën manco tles casses de Comune, ci co sforza da jí a chirí alternatives por finanzia. Pa cöstes alternatives alda la vonüda dai locai olache al ea lëite l'Aziënda y la vonüda dles aziuns dla Sozieté dai Lifc.

TRASPARENZA

Ennant á l'ombolt porté dant ci che al é gnü fat por mioré la trasparenza y ensciö la vijinanza con la popolaziun. Motü man ára scialdi atira con la trasmisciun dles sontades de Consëi ince te internet; al é spo gnü arjigné na televijiun te salf de Consëi olache al vën proieté sö i documonc y ensciö é ince le publich presënt co pó seguí plü saurí i punc tratës; al é gnü lascé fá en design nò por la plata internet dal Comune co é ince lié con la app "Gem2Go" dal Consorzi dai Comuni; al é gnü arjigné le portal prenotaziun. it por aposté danfora strotöres de Comune a Al Plan. Dlungia cösc

vègnel enformé la jont tres i social media Facebook y Instagram, y spo vègnel dé fora "Le Saltà".

PRIORITÉ "SÜGHERTÉ"

Danter i travers che l'Aministraziun se tol dant, aldel ples prioritès chëra dla sügherté. Ples sontades él gnü splighé che ara nen vá tló dandadót dal cuncé les strades, mèter les sis de proteziun olache ares ô ester o olache ares é en malester, ciaré che al vègni laoré ince ples strades da na pert fora. Lapró tochel sambèn ince la sügherté por danns dal tomp, con chi che an á da sciampí te Mareo scialdi gonot. Al basta ponsé a roes y rotes co vèn jö feter pa vigne tompiada. Mâ dal 2021 á le Comune dé fora encér 800.000,00€ por laûrs da comedé danns dal tomp (Corterëi, Pliscia, Ciornadú, Grones, Pescosta, Prestí, Sarjëi etc.)

Por les strades él belo tai ultimi mënsch gnü laoré cotan, sce an ponsa ai trec toc co é gnüs asfaltès danö tai païsc (ciara ince deliberes de Junta pl. 6). Lapró él gnü dé ia da püch i laûrs por comedé la strada da Rara y la strada Brach-Biëi Defora, olache le Comune é sté bun da abiné adalerch finanziamonc extra. Por le 2023/24 é preodü da arjigné i planns por ressané la strada da Frena, y emplü òn ressané damproia ince deplü tretuars. Belo eniann òn fá val' laûrs t'Al Plan, dal 2023 le tretuar "Râs - Ciasé", dal 2024 a Mantëna.

PLAZES DAI JÜC Y FAMILIES

Por les families él gnü alzé fora l'audit Family Plus, olache le Comune vèn "analisé" sön plü ciamps co á da fá con la familia. Al vèn ciaré ci co é belo y al vèn motü jö provedimonc co pó mioré la situaziun por les families. Con le tema families y pici mituns taca adöm ince les plazes dai jüc, olache al vá ennant l'abelimont, en colaboraziun con la Cooperativa Turistica. Belo mâ dal 2022 vègnel investí passa 30 mile euro por cuncé jüc, nen mèter de nös, mèter dô scorzes y garantí la sügherté.

LAÛRS POR LES EGHEs

Desche an sá, án te val' posc da sciampí con l'ega da bëre. Por l'ega da bëre d'Al Plan án belo dé ia la enciaria da fá le proiet por nen pié sò ples Fontanes da Lé dla Crëda; por l'ega da Rina, olache ara scea con l'ega da destödé, él sté ai pröms de messé en sorapost por chirí soluziuns. Na soluziun òn ince arjunje por la condüta dal'ega da bëre Prades - Longega. Enló án da sciampí con ega da rüja y le Comune ô tló roé a en mioramont lascenn puzené fora les condütes con en sistem spezial. Dal 2023 dessel gní arjigné le plann por na condüta nea.

Por ci co reverda les eghe blances y pazes él gnü fat laûrs tres convenziun con la Sozieté dai Lifc, por desgropé le problem tla

strada Plazores, olache les eghe s'abina sò. Lapró él gnü baraté döes pumpes a Longega y an é al laûr por realisé le coletur prinzipal a Runcac.

FIRA OTICA Y LAÛRS

Tema é ince sté chël dla fira otica tai trëi païsc, olache al é endertant pié ia i laûrs te dötes trëi les fraziuns, porchël ne junse tló nia ete plü avisa. Le medemo val por i laûrs y les strotöres nees che le Comune s'arjigna da fá (Crusc Blanca, Scora elementara d'Al Plan, ambulatori, slü jö le proiet dal salf dla musiga a La Pli, arjigné en plann esecutif por le local dla Musiga da Rina), olache i ciafëis deplü enformaziuns sot ales plates dles deliberes de Junta.

MOBILITÉ

Por ci co reverda la mobilité á l'Ombolt cunté ci co é gnü fat y ci che an se tol dant da fá. Belo dal 2021 él gnü aledé na fermada nea jö Framacia, ciamó enviada ia tres l'aministraziun da denant. Dal 2021 é ince garaté en coliamont diret cole bus da Bornech cina Pederü. Dal 2022 él gnü pié a man le regolamont dai taxis, y an s'arjigna da fá le plann dla mobilité.

L'Ombolt á slüt jö la relaziun jö con òna dles gran desfides por i Comuni: la realizaziun dal plann de svilup comunal (Gemeindeentwicklungsplan), olache an ti á belo dal 2021 sorandé la coordinaziun y le plann al arch. Wilfried Moroder. Pa cösc plann alda ince le plann dla mobilité (tres la dita "kyklos") y le plann de svilup turistic. An ô laoré te na forma daverta, deboriada con la jont y - olache al vá debojügn - ince adöm con i comuni ijins. L'Ombolt á envié la jont da se porté ete.

DISCUSCIUN

La jont á spo albü la poscibilité da fá domandes, olache al é gnü porté dant de vigne sort de tematiche. Danter cöstes la situaziun con le Hotel Posta tal zënter d'Al Plan, i laûrs por le salf dla musiga a La Pli y la plaza da Rina, la problematica por i apartamonc convenziun co ne vèn nia dës ca y le trafich. Damané á la jont spligaziuns sön les pistes nees, le consum d'ega tal turism, la via ferata nea sön Piz da Peres, le tru dla roda dô Plaies ete y d'ater.



L'Ombolt Felix Ploner porta dant la relaziun a Al Plan. Sontës él dmc i assessurs Ludwig Rindler, Pepi Tasser, Elisabeth Frenner y Paul Pisching.

Na gradatöra por vigne raiun

Les dezijiuns tutes dal Consèi de Comune tles ultimes sontades. Danter l'ater èl gnü aproé val' sauridanzas por i raiuns de frabiché alesiré



Le Consèi de Comune pla sontada dai 29 de merz.

SONTADA DAI 29.03.2022

Nominaziuns: Le Consèi á mossü sostituf y nominé valgügn mēmbri dla comisciun por la proteziun zivila (Zēnter operatíf comunal por la proteziun zivila). Al é gnü nominé desco **mēmbri efetifs** Christian Rindler - comandant dai Stödäfus d'Al Plan, le dr. Alex Mutschlechner - technich de Comune, le dotur Vincenzo Santonocito - dotur de Comune. Desco **mēmbri suplēnt** èl gnü nominé Harald Frenner - raprejentant por la Crusc Blanca. La enciaria vá cina al 2025.

Regolarmont frabiché alesiré: Le Consèi de Comune á aproé valgünes müdaziuns y integraziuns emportantes pal regolamont comunal por l'assegnaziun dles sperses dal frabiché alesiré.

1) Les gradatöres: Cina ciamó gnël te Mareo fat öna na gradatöra sora por düc i raiuns sön teritore comunal. Cösc comportâ che sce ince mâ önn en damanadü slüt fora fajea recurs por na rajun o por l'atra, èl döta la prozedöra co stea chita ince por i atri damanadus. Cösc con la consequēza che al jea a perde trep tomp, che al podega endertant tomé la gradatöra y che al podega ince se

müdé cotan i prisc. Con la müdaziun vëgnel sën fat na gradatöra por vigne singul raiun y al vën ince fissé por vigne raiun i termínns da fá domanda. Ensciö èl i damanadus co sá belo danfora por ci raiun che ai damana. Le regolamont é gnü müdé al art. 4 coma 1 y dij sën ensciö: *"Dö l'aproaziun dal plann de atuaziun por vigne raiun d'espansciun fissëia la Junta de Comune por vigne zona y con deliberaziun apostâ, le termo por prejenté domanda. La deliberaziun de fissaziun dal termin mëss almanco gnií fata 30 (tronta) dis tan la tomanza dal medemo termo y publicada sön tofla de Comune y tles atres formes ch'an arata dërtes."*

2) Esclujiuns: Dan val' agn â le Consèi fat fora che sce en damanadü fajea domanda por terac alesiré y se tirâ spo zoruch, ne podêl 5 agn nia plü damané dô. Cösta regola ea gnüda portada ete deach'al sozedea gonot che damanadus fajea domanda mâ ensciö por proé, deperpo che l'Aministraziun comunala â endere empó döt le laür da ciaré jö planns y documentaziuns. Sën che i damanadus sá belo danfora por ci raiun che ai damana, á le Consèi tut la dezijiun da smendrí a 3 agn le tomp ch'ai vën slüc fora - sce ai se tira

empó ciamó zoruch. Le regolamont é gnü müdé al ultimo coma dal art. 5 y dij sën ensciö: *"I damanadus co renunziëia al'assegnaziun de sperses te raiuns dal frabiché alesiré ne pó por i proscimi 3 (trëi) agn nia plü dé jö na domanda d'assegnaziun nea."*

Regolamont dla cortina: Le Consèi de Comune á aproé müdaziuns emportantes al regolamont dla cortina d'Al Plan. Por detais ciara a tal cadrel da corú a plata 22.

Proiet redaziun plann dal clima: Le Consèi de Comune á fat fora da tó pert al proiet "Sostēn redaziuns dai planns de sconanza dal clima - regiun clima y energia Val de Puster". La chestiun é cösta: de setēمبر dal 2021 á la Provinzia de Balsan atualisé le plann dal clima y dal strom - Südtirol 2050, y cösc prevëiga che i comuni s'arjigni anter le 2024 en plann de sconanza dal clima y lapró ince en plann dla löm. Por realisé le plann de sconanza dal clima èl ince preodü da ciaré contribuc contribuc provinziäi, sce i Comuni tol pert al program ComuneClima, tla categoria "ComuneClima Light" o "ComuneClima Certificaziun". Sön cösta s'á ativé la Comunité Comprensoriala Val de Puster, co á motü en pé en proiet por sostegní i comuni da arjigné ca le plann de sconanza dal clima, mo ince da mëter jö i provedimonc da tó. Döt cösc sambēn en colaboraziun con raprejentanc dai comuni enteressēs. Mareo tol pert al proiet, co dörará endöt 3 agn. I cosc por le Comune te düc i trëi agn adöm é de 16.327,00€.

Aziuns: Le Consèi de Comune á fat fora da vëne tres lizita les 1.726 aziuns che al á dla Sozieté dai Lifc. Deplü tal cadrel da corú a plata 7.

Urbanistica/1: Al é gnü aproé le 2. provedimont por na müdaziun al plann de atuaziun co reverda le raiun abitatíf B1 - raiun de completamont,

plü avisa la spersa co tol ete Garni Erna y Villa Rezia. Por en fal material é l'iter endere pié ia danö. Val' plü avisa ciafëise a plata 12 y 13.

Urbanistica/2: Le Consèi á azeté l'arat positif dla Comisciun comunala dal teritore y dla contrada sön la müdaziun de en toch de terac da *"vërt agricul/emplant por le tomp/lëde con liam particular dla contrada"* t'en raiun de *"vërt agricul/d'atri raiuns con liams particulars dla contrada."* Ara se trata d'en terac sön les ppdt 392 y 393 tal CC de Mareo (za. 200 metri sot La Pli jö), olache al ea da en tomp gnü porté ete da fá na plaza da trá le palê. La chestiun é sp ligada plü avisa tal ultimo Saltà a plata 8.

Urbanistica/3: Le consèi á azeté l'arat positif dla Comisciun comunala dal teritore y dla contrada sön la müdaziun al plann urbanistisch, defora dal raiun "Pincia de Calogna" cuntra Brach, por müdé da *"vërt agricul/strada comunala C/strada comunala D/d'atri raiuns con oblianzas particulares por la contrada"* te raiun de *"vërt agricul/strada comunala de sort C/strada comunala de sort D/d'atri raiuns con oblianzas particulares por la contrada/raiun con plann de recualificaziun urbanistica - PRU"*. La chestiun é sp ligada plü avisa tal ultimo Saltà a plata 8.

SONTADA DAI 28.04.2022

Bilanz: Al é gnü aproé na müdaziun de bilanz. La maiú soma ples entradas reverda i 292.878,44€ de contribuc provinziail por le coletur dles eghes pazes por le raiun "Runcac". La medema soma ciafon spo ince ples spëises, destinades por la medema opera.

Cunt consuntif/1: Le Consèi á aproé i cunc consuntifs 2021 dai stödafüs de nosc comune.

I Stödafüs d'Al Plan á albü entradas por 76.108,14€ y spëises por 63.899,86€. Al romagn en avanz d'aministrazion de 12.208,28€.

I Stödafüs d'La Pli á albü entradas por 67.763,30€ y spëises por 33.554,00€. Al romagn en avanz de 32.909,30€.

I Stödafüs da Rina á albü entradas por 20.191,95€ y spëises por

14.360,57€. Al romagn en avanz de 5.831,38€.

Cunt consuntif/2: Le Consèi á aproé le cunt consuntif, cunt economic y patrimonial dal Comune por l'ann finanziair 2021. Le fond de cassa ai 01.01.2021 ea de 1.867.525,13€. la por l'ann án albü 9.571.104,25€ de entradas y 10.113.240,07€ de spëises. Ai 31.12.2021 êl ensiö en saldo de cassa de 1.325.389,31€. Cumpedenn lapró y tolen demez i resc atifs y passifs, desco ince i fons vincolês, rounse sön en resultat d'aministrazion ai 31 de dezëmber 2021 de 4.733.434,74€. Da cösta soma êl da tó demez 214.627,21€ de scioldi co vá te fonds desvalis de oblianza. Ensiö romagnel l'avanz d'aministrazion co pó gní destiné.

Avanz: Le Consèi á destiné l'avanz d'aministrazion co munta sô a 4.733.434,74€. Tló êl da dí damperfora che al é lëite ince zifres tutes ete por rajuns de contabilité. Ensiö ciafun lëite scioldi vincolês por proiec enviês ia l'ann passé o proiec belo preodüs tal bilanz de previjun, desco i 951.315,59€ por la fira otica a La Pli y Rina, 956.230,15€ por la sonta nea dla Crusc Biancia, i 450.000,00€ por la strada Brach - Biëi Defora, i 151.548,00€ por le ressanamont dla Ciasa dal Sport d'Al Plan, i 604.534,00€ gnüs dala vonüda dai locai olach'al ea lëite l'Aziënda. L'avanz efetif ch'an á podü destiné é de za. 1,2 miliuns de euro. Les somes plü avisa ciafëise

tla tabela a plata 23.

Plann dla löm: Le Consèi á aproé le plann dla löm. Ara se trata d'en plann che vigne comune mëss s'arjigné, olache al vën empröma analisé la situaziun dla iluminaziun publica y privata, (ajiamont lominus, consum energetich etc.) y olache al vën spo ince preodü provedimonc aladö, por la passené ai criters dës dant dla Provinzia de Balsan. Le plann dla löm y la documentaziun lapró é gnüda arjignada jö dal p.i. Georg Mutschlechner. Le plann i é spo gnü mené ennant ai ofizi provinziail de competonza.

Convenziun: Le Consèi de Comune á aproé la convenziun con la sozieté "Kronplatz Seilbahn AG" por le sorvisc dal'ega da bëre sön Plan de Coronas, olache al vën ince sorví frabicac co é sön terac dal Comune de Mareo. La sozieté á 7 conzesciuns: la "Ochsenalmquelle" 1, 2 y 3 tal comune catastral da Raiscia y les "Belvederequellen" 1 cina 4 tal comune catastral da Valdaora

SONTADA DAI 27.05.2022

Nominaziuns: Dö che al é tai ultimi mëssc gnü laoré cotan por la reorganisaziun dai ofizi de Comune, á le Consèi nominé i responsabli por valgünes unitês organisatives, pienn ia con i 01.06.2022. Le dr. Alex Mutschlechner é gnü nominé responsabl por l'ofize tecnich y lizonzes, la colaboradëssa



Tla sontada dai 27 de má á le Consèi aproé le plann pedagogich por la scora elementara d'Al Plan, co gnará ampliada.

Margareth Rubatscher é gnüda nominada responsabla por l'ofize dles cultes.

Urbanistica/1: Al é gnü aproé le 2. provedimont por na müdaziun al plann de atuaziun co reverda le raiun abitatif B1 - raiun de completamont, (spersa Garni Erna y Villa Rezia). Ciara ince ales plates 12 y 13.

Scora elementara: Desche al é belo gnü scrit, él tl'intenziun de cösta aministraziun da ressané y amplié la scora elementara d'Al Plan. Por podëi fá chisc laürs, ôl ince ester en plann pedagogich dla frabica. Cösc

é gnü aproé dal Consëi de Comune. Le plann pedagogich é gnü laoré fora da en grup de laür motü adöm dales cin' insegnantes dla elementara Verena Castlunger, Lucia Clara, Sabine Pezzei, Rita Willeit y Irene Zingerle, sot la supervijiun dal espert de costruziuns scolastiches dr. Josef Watschinger. Ales encuntades á ince tut pert l'assessur ales scores Ludwig Rindler, desco ince le diretur dla direziun raionala d'Al Plan Heinrich Videsott. Ince les atres insegnantes y insegnanc dla elementara d'Al Plan á albü la poscibilité da porté ete söes propostas y vijiums. Le plann pedagogich definësc en sostanza

l'organisaziun dla scora, la vita de scora, le program dai salamonc aladô dles esigënzes, l'organisaziun dal emparé, esigënzes tecniches, de aredamont y tan d'ater.

Regolamonc: Le Consëi á aproé na müdaziun regolamont comunel por le frabiché, plü avisa al coma 1 dal art. 11. Le test dij šën ensciö: *"le president y le secretér é enciariës con la redaziun y firma dal verbal; la sontada é da araté fata tla sonta dal comune (ciasa de comune)." Denant êl scrit che ai podes s'encunté ince te d'atri posc. Šën él gnü definí desco post la Ciasa de Comune.*

REGOLES DE CORTINA

La cortina nea d'Al Plan vën aministrada dal Comune, la cortina vedla dala Ploania. Deache al ea desvalianzes, él gnü arjigné en regolamont unitar, laoré fora deboriada dal assessur Paul Pisching, la secreteria Verena Ellecosta y le colaboradú Alfons Facchini por le Comune, signor Klaus Sottsas, Paul Vallazza y Lois Promberger por la Ploania. I ves dijun ci co s'á müdé.

Art. 1 y 2. Šën él döes comisciuns comunales de cortina. **La picia comisciun** tol les dezijiuns sön l'estetica dles fosses. Ara é motüda adöm da 1 raprejentant de Comune motü dal Consëi, en colaboradú de Comune y signor Ploan. **La gran comisciun** co tol dötes les atres dezijiuns en cunt dla cortina, é motüda adöm da 1 raprejentant de Comune nominé dal Consëi, en colaboradú de Comune, signor Ploan y dui raprejentanc dla Ploania. Les comisciuns gnará motüdes sô proscimamonter.

Art. 8, coma 2: Ples tipologies de fosses él fosses individuales, fosses de familia y fosses por mituns. Con la müdaziun él gnü motü lapró fosses por urnes y fosses por porsones de n'atra cultura o confesciun.

Art. 9.: Dô 20 agn dla ultima sopoltöra de na salma te na fossa de familia, pó le post gní adoré por sopelí n'atra persona dla medema familia.

Art. 13, coma 1: Sön les fosses individuales dla cortina vedla pón

mëter sô crusc de fer batü, ram o brom con n'altëza de 140 cm. La larghëza dal socl o dla pera mëss ester de 70 cm y l'altëza dai medemi ince de 70 cm; les zorghes mëss avëi na lungheza de 120 cm - con lapró le socl o la pera. Les fosses de familia á cöstes mosöres: 130 cm leries, 120 cm lunges, con altëza dles crusc de 140 cm. **Coma 10:** les dimensciuns dles fosses y la lerch danter les fosses (50 cm) mëss gní tignides ete avisa. **Coma 11:** Na fossa por urnes é de 60 x 60 cm. Al art. 13 él spezifiché che te na fossa por urnes o te na fossa de tera pól ince gní sopelí plü urnes, sce al é lerch assá.

Art. 16: Te cortina vedla él conzedü da sopelí sce al é passé almanco 20 agn dala ultima sopelida. Fina che al ne vá nia debojügn, ne pó les atres fosses nia gní adorades danö por almanco 30 agn, dedô gnaráres tutes ca dô ordinn cronologich. Scrins de

banda mëss gní lascës almanco 40 agn te fossa, denanco gní ciaës sô.

Art. 22: por ci co reverda les proibiziuns speziales te cortina, él gnü enjunté che an ne pó nia condü ete cians o d'atri tiers, gnanca sce ai é te na corda. Le strauf aministratif vá da 100 a 600,00€.

Por les fosses él preodü tarifes una tantum por la conzesciun y tarifes anuales por la manutenziun dla cortina. Cöstes é gnüdes fissades dla Junta ai 5 d'aorí 2022.

Tarifes por conzesciuns

- fossa de familia: 3.100,00€ plü le ciaé
- urnes: 780,00€
- fossa individuala: mã le ciaé

Tarifes por manuteziuns

- fossa de familia: 50,00€ al ann
- fossa individuala: 25,00€ al ann
- vigne atra fossa: 20,00€ al ann



MÛDAZIUN AL BILANZ DE PREVIJIUN	CONSËI	DELIBERA DAI 25.10.2021	
Entrades	Soma	Spëises	Soma
Culta por l'ocupaziun de sperses publiches	-7.140,00€	Ala Coop. Turistica - personal daz	8.000,00€
Culta comunala por le retlam	-9.858,16€	Sorvisc (Consoz dai Comuni)	10.000,00€
Contribuc Covid (trasferimont da 2021 a 22)	33.998,00€	Contribuc Covid (trasferimont)	33.998,00€
Contribut prov. por gestiun Ciasa dai Pici	58.187,50€	Sorvisc finanziazi (Tesoreria)	8.000,00€
IVA - Split comercial	20.000,00€	Cosc anuai portina SUAP	500,00€
Maius entrades sön tarifa dal refodam	10.000,00€	Paia mont IVA a debit	20.000,00€
Assügheraziuns	25.000,00€	Guanc laoranti de Comune	-2.000,00€
Conzesciuns y autorizaziuns por retlam	16.998,16€	Cosc emplü sorvisc Comunité de Val	10.000,00€
Contribuc Consoz BIM por operes publiches	19.791,00€	Manutenziuns	5.000,00€
Vonüda terac por frabiché alesiré - Runcac	120.890,00€	Rembursamont terac alesiré Runcac	120.890,00€
Contr. prov. por iluminaziun publica Mantëna	25.000,00€	Cosc emplü biblioteca	2.010,36€
Contribuc prov. por operes publiches lege 27	-73.489,13€	Rembursamont	25.000,00€
Contribut provincial por strada Grones	104.686,88€	Contrac de sorvisc (mëndri cosc)	-16.188,45€
Contribut provincial por la strada da Rara	600.000,00€	D'atri sorvisc + spëises contratuales	18.000,00€
Retegnüdes previdenziales	5.000,00€	Paie ete retegnüdes previdenziales	5.000,00€
		Spëises contratuales	2.000,00€
		Material scolina La Pli	1.000,00€
		Tofles de strada	5.000,00€
		Cosc emplü forza eletrica	15.000,00€
		Cosc emplü ciarburanc	6.000,00€
		D'atri bëns de consum	2.865,59€
		Marcês - mëndres entrades	-1.800,00€
		Strada da Rara	600.000,00€
		Strades y plazes	-5.147,00€
		Cap. fira otica Comun - Ciasa dal Parch	10.000,00€
		Scolina (Omerel La Pli y acustica Rina)	7.550,00€
		Pumpes eghes fosces Longega	18.815,73€
		Cap. defibriladus (soma co mancia)	23,00€
		Proiet pié sò ega da bëre Lé dla Crëda	27.755,00€
		Salf dla Musiga La Pli (variante)	5.813,02€
		Plann sconanza dal clima	6.032,00€
ENDÖT	949.064,25€	ENDÖT	949.064,25€

APLICAZIUN DAL AVANZ D'AMINISTRAZIUN (Somes plü emportantes)	SOMA
Costruziun y manutenziun de strades y plazes	424.103,14€
D'atri laürs por fá asfalt (dandadöt ete por la Val dai Tamersc)	34.572,74€
Coletur dles eghes pazes por le raiun Runcac	160.000,00€
Infraströtöres raiun d'espansciun „Runcac“	91.000,00€
Infraströtöres raiun d'espansciun „Corn“	60.000,00€
Laürs de drenaja Al Plan (condüta da Plazores - ex nodadoia - Tlosöra da Cianëi)	60.000,00€
Cumpré na mascinn de Comune nea	70.000,00€
Ega da bëre (laürs por mioré la situaziun con l'ega da bëre Prades - Longega)	60.000,00€
Plann de svilup comunel	50.000,00€
Salf dla Musiga La Pli	25.000,00€
Fira otica Al Plan	50.000,00€
Canalisaziun Alfarëi - Colac (20 mil), Condütes eghes (22 mil.) y Ciasa dai Pici (20 mil.)	62.000,00€
TOTAL DAL CAPITUL DLES INVESTIZIUNS (tla tabela él mâ les maius spëises)	1.146.675,88€

CICHES DE ZIGAREC

Al é na fetra üsanza, chëra da sciüré ia por tera les ciches de zigaret: che al sidi sön strada, fora da finestra d'auto, tai parcs publics y ince sò por munt. L'Ofize Natöra dla Provinzia á porchël lascé fá de pici cendrins da mëter te rucsoch, co passenëia te vigne gaiofa y co pó gní adorès da destödé y mëter ete les ciches de zigaret. **An pó jí a s'ai dô debann te Ciasa dal Parch Natural Fanes - Senes - Braies.** Forsc en impuls por i fömadus danter nos, y ince na proposta che i ostis pó ti fá ai ghesc de ciasa. Ciches empiades ne n'é nia mã prigoroses por medefü, sce ares vën sciürades tla natöra, mo ares é ince de dann por le terac. Le direttur dal Ofize Natöra Leo Hilpold dij t'en comunicat che les ciches á plü agn



Le picio cendrin da jí sò por munt, che an ciafa debann te Ciasa dal Parch Natural.

da se desfá, te munt ince cina 7 agn. Lëite él encër 4.000 sostanzas danoses desco arsen, plom, crom y dandadöt nicotina. Sce ares resta sot le tomp, él les sostanzas co röa tal terac y ala fin ince tles eghes.

AL VËN CHIRÍ VERDASCOLARI

Le Comune de Mareo chir da cösc altonn ennant **döes porsones co se metess a desposizun da fá le sorvisc da verdascolari tal paisc d'Al Plan.** Al é en sorvisc d'öga y de valüta por la sügherté de mitans y mituns co se mët sön tru da scora a pé. Chi co foss a desposizun pó s'anunzié te Comune, olache ai pó fá domandes y ciafé enformaziuns desvalies. Iolan belo damperfora.



Verdascolari - sorvisc de valüta.

AIÜT TRES I CÖRS DLA VAL BADIA

Tai ultimi mënsc é corsciüs dassënn i cosc t'en gröm de seturs primars dla vita: mangiaria, scialdé, forza eletrica, benzinn y ater. Tan che families n'é nia plü dagnora bones da fá frunt a dötes les spëises. Le proiet „Cörs dla Val Badia“ ó ti sté dlungia y chël vára mã da fá con Osc aiüt. Sce i l'aratëis de valüta, vëgnel perié dô na spënora, da fá sön le cunt IBAN IT29V 08010 58180 000302018519 . Iolan. Les porsones co á enstësses



debojügn é enviades da s'an anfidé y damané dô. Formulars ciafun sön www.solidariete.it y an pó ince i dé jö tal ofize dal KVV.

AVISC DESVALIS

ZËNTER DE REZICLAJE

Le zënter de reziclaje ta Ciamoor é davert **vigne dedemesaledema dales 14:00 ales 16:30 y vigne vëndres dales 15:00 ales 20:00.**

ËRI Y GRASC

La firma **Dabringer Srl** da **Feldthurns** vën ciamó a chëie adöm eri y grasc de hotí y restoranc le lönesc ai **26 de setëmber**. Sce eserzizi ess da avëi debojügn de na jütada sorapró, pón telefoné al **0472 979700**, fax **0472 979710** o **info@dabringer.it**

LAÉ I CHIBLI DLES LAADÖRES

Chisc é i terminns che al vën laé fora i chibli dles laadöres:

- 5, 12, 19 y 26 d'agost
- 2 y 16 de setëmber

DOTUR SANTONOCITO

Orars dal dotur de ciasa Vincenzo Santonocito:

- **lönesc y dedemesaledema:** 14:00 cina 17:00 sön prenotaziun y dales 17:00 ales 18:00 por scrí medejines
- **dédölönesc y jöbia:** 8:30 cina 11:30 sön prenotaziun y dales 11:30 ales 12:30 por scrí medejines
- **vëndres:** dales 8:00 ales 9:00 sön prenotaziun y dales 9:00 ales 9:30 por scrí medejines.

DEFENÜDA ZIVICA

La defensuria zivica dra. Gabriele Morandell o söa sostituta tin udiënza vigne 2 mënsc, le secundo vëndres, dales 14:00 ales 17:00, te ciasa de Comune ta San Martin. **I proscimi terminns é:** 9 de setëmber y 11 de novëmber. An mëss s'anunzié al 0471 946020 o ala mail **post@volksanwaltschaft.bz.it**



Impressum: "Le Saltà" - Plata d'enformaziun dal Comun de Mareo
- Editur: Comun de Mareo / Ombolt Felix Ploner - Vën fora trëi iadi al ann - **Diretur responsabl:** Iaco Rigo. **Redaziun y Layout:** Pablo Palfrader. Registrada pal Tribunal da Balsan nr. 24/2011.
Stamparia: Tezzele by Esperia Srl, 39100 - Balsan. **Misciun:** Ciasa de Comun, str. Catarina Lanz 48, 39030 Al Plan de Mareo (BZ), tel. 0474/501023, fax 0474/501644, e-mail: **info@comun.mareo.bz.it** - Internet: **www.comun.mareo.bz.it**.

